



C40
4514
57



C40-45-14



了翁上書請大藏及有  
家書是武州北雲山  
海微矣海苑府中永  
為者不敢許出院內  
昔山二世鐵牛擬謹誌

B 64853

大方等大雲經卷第二

北涼天竺三藏法師曇無讖譯

大雲初分三昧捷度第二

爾時大雲密藏菩薩摩訶薩言甚奇世尊如來正覺  
不可思議今說此經令無量眾生發阿耨多羅三藐  
三菩提心是經境界不可思議乃為一切無量眾生  
現大神通雨諸味寶眾生聞者得遇無上甘露法雨  
是故如來不可思議是經境界亦不可思議一切眾  
生成大功德乃得值遇眾生業報不可思議世尊今  
日眾生所受快樂如第三禪形貌瓊瑋如天無別如

來今日說此經藏卽是衆生無盡之藏降大法雨所謂如來常住不變三昧總持所言雲者謂菩薩摩訶薩也震大雷者謂破煩惱諸結業等電光明者謂諸衆生皆有佛性聲者謂諸菩薩爲衆生故說有爲法無常無樂無我無淨電者謂入聖道分能壞一切諸結煩惱又有雹者所謂此經能壞聲聞辟支佛心是卽名爲雨大法雨克飽衆生飢虛渴乏所謂如來常住不變是名甘雨佛言善哉善哉善男子汝今善解如是法雨善男子若諸菩薩欲雨法雨潤益一切當受是經修行讀誦書寫供養解說其義善男子諦聽

諦聽如是經典不可思議中有解脫住入寶藏神足法王四百三昧我今當說善男子此經復有諸佛菩薩深猛大海眼目三昧若有菩薩成就具足是三昧者得具菩薩多聞大海多聞寶藏於阿耨多羅三藐三菩提心無疑礙言無礙者所謂身得無礙徧生諸佛淨妙世界又無礙者得宿命智爲諸衆生轉於五有又無礙者不貪著業而得果報又無礙者若一見佛心生歡喜則於後世得端嚴身衆所愛身無貪身無惡身大身上族身大富身眷屬不壞身不破壞身不退身不減身所修行願念喜作業悉向阿耨多羅

三藐三菩提成就慚愧破諸憍慢勤修精進慈悲喜捨空無相願以熏其心又無礙者願生他土卽得往生諸邪異見所不能壞其所樂說句義無盡若天若魔梵沙門婆羅門不能惑亂令其心動雖讀外典心無貪著不貪天龍夜叉等身乾闥婆阿脩羅迦樓羅緊那羅摩睺羅伽身又不貪著房舍臥具衣服飲食天魔波旬不得其便所行善法終不中忘凡所說人所敬受其心弘曠猶如大海所有智慧亦復如是具足圓滿猶如盛月能壞黑暗如日如燈不可捉持如虛空性不著世間如華處水於一切有心無貪著

能壞法界猶如金剛持諸法界如須彌山其性清淨如瑠璃寶得如來戒慧心念明性力幻化不動不住善男子是名第一甚深解脫寶幢三昧若有菩薩具是三昧則得名爲多聞大海多聞寶藏心無疑礙乃至幻化不動不住善男子此經復有淨智甚深法門三昧若有菩薩能具足者則得名爲多聞大海多聞寶藏心無疑礙乃至幻化不動不住善男子此經復有佛根香象王解脫三昧普楞嚴三昧勇力三昧勇勝王三昧健勇三昧好香三昧正光三昧無我光三昧甚深行藏三昧行深解脫三昧行力解脫三昧一

切法行三昧恒河沙等行三昧一切解脫三昧一切  
三昧王三昧正上三昧大海潮三昧本解脫三昧壞  
魔億眾三昧住戒電光三昧火光三昧無盡意王三  
昧雲盡意三昧海王神足三昧大高意三昧種子三  
昧住大海三昧無礙三昧無礙戒三昧高解脫三昧  
因緣意三昧業作三昧健行王三昧大力三昧甚深  
瑠璃王三昧須彌山王三昧師子吼王三昧甘露味  
三昧莊三昧火三昧蓮華光三昧國土喜三昧一劫  
身三昧動大海王三昧動大地王三昧一切三昧母  
三昧壞一切女身三昧師子行王三昧圓王三昧細

行三昧鼓聲微妙三昧增長三昧斷有三昧流三昧  
廣慧三昧變化三昧光明三昧壞暗三昧大海智慧  
三昧讚歎三昧大讚歎三昧時三昧大時三昧現在  
解脫三昧合散三昧分陀利華三昧輕三昧大樂三  
昧虛空三昧解脫身三昧斷語三昧斷聲三昧愛三  
昧無勝三昧一切三昧鬚三昧龍王三昧風三昧風  
行王三昧無邊三昧無色三昧無邊色三昧法意三  
昧微妙香三昧身意三昧耆楞嚴三昧壞惡三昧蓮  
華意三昧大力翅三昧壞無明三昧菩提樹三昧寶  
命三昧大力命三昧日光三昧月光三昧大海門三

昧一切法界三昧結使根三昧戒雨三昧戒雲三昧  
菴羅果三昧菴羅華三昧淨三昧水三昧螺三昧時  
三昧時王三昧眾三昧無身三昧界三昧善界三昧  
地三昧地神足三昧水等三昧青蓮華三昧甘露味  
三昧無繫三昧鴛鴦三昧車輪三昧轉輪聖王三昧  
不動三昧不輕三昧不長三昧憐愍三昧淨意三昧  
一切功德意三昧伊羅鉢羅三昧無疑解脫三昧風  
神足王三昧無量幢三昧虛空界三昧無彗星三昧  
寶光三昧電時三昧童子三昧王子三昧斷毒三昧  
法燈三昧國王王三昧施世界三昧法貴德三昧法

力三昧上華三昧喜三昧大喜三昧知大力三昧鎮  
頭迦果三昧精進三昧稱三昧白鷲王三昧身光三  
昧無盡力三昧無盡力解脫三昧增長名三昧端正  
三昧能破壞三昧摩樓迦華三昧善行王三昧善光  
三昧寶地三昧白三昧白種三昧淨行意三昧愛光  
三昧虛空心三昧天冠三昧轉輪聖王冠三昧念菩  
薩三昧護意三昧護甚深三昧力乘三昧力乘光三  
昧力士三昧力士精進三昧閻浮國三昧鰐魚三昧  
蟒蛇三昧境界王三昧淨境界三昧使心三昧朝青  
三昧有德意三昧大青三昧大海色三昧大安三昧

駒三昧無駒三昧金剛意三昧世尊目三昧須彌山  
王三昧雪山王三昧世尊現行三昧勝三昧蓮華三  
昧拘勿頭華三昧月藏三昧月樂藏三昧華敷三昧  
地鬘三昧現在念世尊王三昧勝住三昧善住三昧  
善行三昧大海三昧一切入平等三昧入一切疑三  
昧大藥三昧大藥力三昧甘露藥王三昧大藥力三  
昧大藥王三昧大冷三昧大海大冷三昧無冷無熱  
三昧安三昧安力三昧一乘三昧三乘三昧釋慧星  
三昧有德三昧寶圓王三昧無定色三昧定華三昧  
六入真淨三昧大界三昧能壞欲界三昧瓔珞三昧

金色三昧智愛三昧智圓王三昧智子三昧分陀利  
華三昧日光王三昧月愛三昧光王三昧光圓王三  
昧淨光王三昧光藏三昧青光三昧時光三昧斷暗  
三昧光潮三昧箭光三昧一切善根三昧婆羅那香  
象王三昧未生怨王三昧調柔三昧能壞憍慢三昧  
妙德三昧妙聲三昧貪味三昧圓地王三昧神通王  
三昧神通根三昧轉輪聖王旛三昧轉輪聖王幢三  
昧師子頭三昧日神通三昧法護三昧廣三昧知業  
神通王三昧高三昧無上三昧燈土三昧舍宅三昧  
多喜三昧初地三昧戒地三昧大海喜王三昧大海

慈王三昧大海悲王三昧大海捨王三昧忍辱王三  
昧忍辱力界王三昧神通至心三昧入解脫門三昧  
法界畢竟三昧無界三昧無性三界大田種子三昧  
智池三昧海三昧海力三昧佛眼三昧佛門三昧種  
智行三昧佛面三昧一切親三昧一切福德王三昧  
虛空藏三昧虛空幻三昧佛幻三昧惡性三昧治毒  
三昧眠三昧覺三昧夢三昧得三昧神通王三昧無  
我神通三昧勝見三昧勝喜三昧隨世三昧佛面住  
三昧正見三昧一切微塵三昧語無礙三昧淨三昧  
身光三昧身燈三昧不癡三昧不狂三昧一切勝光

三昧水意三昧漂三昧水沫三昧無勝三昧無勝智  
三昧無勝身三昧精進三昧恒河沙等勝王三昧知  
見圓光王王三昧斷畜生三昧願生畜生有三昧畜  
生神通三昧樂畜生三昧不染畜生業三昧入地獄  
三昧喜地獄三昧不染地獄業三昧不染地獄業行  
神通王三昧安樂行體三昧有德河三昧有德海三  
昧淨河三昧淨行功德福德三昧福德青三昧淨福  
德聞三昧有德夢三昧讚歎三昧有德夢得三昧有  
德夢行三昧正有德三昧正有德王三昧淨增長三  
昧智雨三昧風同行三昧吉三昧吉莊嚴三昧吉神

通三昧吉神通王三昧無戒三昧裸色三昧受戒三  
昧讚戒三昧戒實三昧智燈三昧得戒實三昧常戒  
三昧常戒入藏見三昧心三昧心王三昧常戒善三  
昧常樂戒三昧戒瓔珞三昧戒天冠三昧戒具足三  
昧戒鬘三昧戒香三昧戒華三昧戒塗末香三昧戒  
神通王三昧一切味三昧一切華三昧一切香醉三  
昧斷一切虛妄三昧受安樂三昧斷一切世法王三  
昧常三昧恒三昧不變三昧地三昧無刺地三昧無  
石沙三昧地等三昧大雲璠璃王三昧聲鼓三昧大  
雲電三昧大雲瀑水王三昧大雲水藏三昧大雲水

鬘三昧大雲安水三昧大雲水疑三昧大雲智海三  
昧大雲勝力三昧大雲水光持王三昧大雲水潮海  
三昧大雲海種三昧大雲不動水三昧大雲水不動  
神通王三昧大雲端正王三昧大雲一味三昧大雲  
一乘三昧大雲安水流三昧大雲多水三昧大雲冷  
水三昧大雲不冷不熱神通王三昧大雲月王三昧  
大雲有德三昧大雲初力三昧大雲渴三昧大雲樂  
三昧大雲水行王三昧大雲虛空行三昧大雲水寶  
三昧喜三昧大雲寶種三昧大雲護三昧大雲水淨  
王三昧大雲水歸依印三昧大雲法印三昧大雲水

淨光三昧大雲大水藏王三昧大雲水定三昧大雲  
蓮華三昧大雲水界三昧大雲水等三昧大雲夜行  
三昧大雲水清三昧大雲海無盡意三昧大雲放光  
三昧大雲藏三昧大雲水聚三昧大雲水柱三昧大  
雲師子王三昧大雲樂三昧大雲淨三昧大雲貪三  
昧大雲幢三昧大雲甚深三昧大雲雷三昧大雲增  
長水三昧大雲藥王三昧大雲醉味三昧大雲師子  
行三昧大雲大香象王三昧大雲安樂三昧大雲風  
三昧大雲水行不動三昧大雲無畏三昧大雲水順  
三昧大雲無盡意三昧大雲漏難數三昧大雲雷大

力三昧大雲水喜三昧大海水圓三昧大雲水旛三  
昧大雲甘露雨三昧大雲梅檀涼三昧大雲吉三昧  
大雲畢竟三昧大雲無終始三昧大雲羅網三昧大  
雲寶雨三昧大雲祕密三昧大雲彗星三昧大雲意  
密三昧大雲大動三昧大雲滅三昧大雲微妙音三  
昧大雲恒河沙等三昧大雲水健三昧大雲鷲王三  
昧大雲水行三昧大雲命三昧大雲王三昧大雲誑  
三昧大雲首楞嚴三昧大雲馬王三昧大雲柏樹三  
昧大雲無盡雲三昧大雲一切等三昧大雲一切雨  
三昧大雲一切和合三昧大雲菴羅樹果三昧大雲

山卑三昧大雲堅靱三昧大雲密行三昧大雲密實  
三昧大雲鷲王行三昧大雲不可思議三昧大雲入  
住神通王三昧善男子若有菩薩具足如是諸三昧  
門則得菩薩多聞大海多聞寶藏於阿耨多羅三藐  
三菩提心無疑礙終不墮落於三惡道不生邊地得  
宿命智造生死業樂於生死常得值遇佛法僧寶乃  
至夢中亦不捨離得端正身人所愛身無貪身無惡  
身大身種姓身眷屬和樂不可沮壞不退不減不墮  
不沒其所修行深心念慧悉皆趣向阿耨多羅三藐  
三菩提得慚愧力斷除憍慢勤修精進慈悲喜捨空

無相願以熏其心願生淨土卽得往生衆邪異見所  
不能壞說法次第句義不斷雖讀外典心不貪著終  
不願求天身龍身夜叉身乃至轉輪王身亦不造作  
生死行業不求世間供養恭敬護持正法魔不得便  
見持法者深生恭敬所得智慧猶如大海不增不減  
如月盛滿除衆暗冥如日如燈不受煩惱猶如虛空  
煩惱不染如華處水住無所住如空無別破散諸法  
如真金剛持一切法猶如雪山定知如來常不變易  
其智清淨如瑠璃寶行如來戒勢力大海其心慈哀  
憐愍衆生不動不轉如帝釋幢壞諸惡法得上妙味

猶如美妙迦陀迦果隨順世法無所違逆善男子是  
則名爲初三昧門善男子若有成就具足如是四百  
三昧當知是人善護法藏爾時衆中有一天子名曰  
淨密與萬八千諸天子俱來至佛所頭面作禮合掌  
恭敬雨天華香幢幡妓樂以供養佛右繞三匝卽說  
讚曰

如來不思議 法僧亦復然 我見三昧雨

如世親甘露

大雲初分陀羅尼捷度第三

爾時大雲密藏菩薩白佛言世尊若有衆生未入如

是方等經者當知是輩猶如盲聾此經中有三十六  
種不退智寶無邊心行意入陀羅尼門卽是一切諸  
法初門唯願如來爲是等故廣宣分別佛言善哉善  
哉善男子諦聽諦聽善思念之今當爲汝分別解說  
此經中有諸佛菩薩不退寶輪藏陀羅尼門此經復  
有諸佛菩薩大雲不退清淨淨密水陀羅尼復有諸佛  
菩薩大雲不退祕密光明陀羅尼復有諸佛菩薩大  
雲不退大雨陀羅尼復有諸佛菩薩大雲不退流水  
陀羅尼復有諸佛菩薩大雲不退盡意陀羅尼復有  
諸佛菩薩大雲不退電光陀羅尼復有諸佛菩薩大

雲不退涼電陀羅尼復有諸佛菩薩大雲不退淨光  
陀羅尼復有諸佛菩薩大雲不退彗星意陀羅尼復  
有諸佛菩薩大雲密不退密藏光意陀羅尼復有諸  
佛菩薩大雲不退大呪意陀羅尼復有諸佛菩薩大  
雲不退有德意陀羅尼復有諸佛菩薩大雲不退虛  
空藏王陀羅尼復有諸佛菩薩大雲不退大藥王陀  
羅尼復有諸佛菩薩大雲不退大雨王陀羅尼復有  
諸佛菩薩大雲不退稱意陀羅尼復有諸佛菩薩大  
雲不退枳羅娑山意陀羅尼復有諸佛菩薩大雲不  
退意行陀羅尼復有諸佛菩薩大雲不退上高王陀

羅尼復有諸佛菩薩大雲不退潮王陀羅尼復有諸  
佛菩薩大雲不退鷲王目陀羅尼復有諸佛菩薩大  
雲不退大海智陀羅尼復有諸佛菩薩大雲不退甚  
深意王精進陀羅尼復有諸佛菩薩大雲不退兩種  
陀羅尼復有諸佛菩薩大雲不退地曼陀羅尼復有  
諸佛菩薩大雲不退歡喜陀羅尼復有諸佛菩薩大  
雲不退世意陀羅尼復有諸佛菩薩大雲不退不動  
意陀羅尼復有諸佛菩薩大雲不退地陀羅尼復有  
諸佛菩薩大雲不退積聚陀羅尼復有諸佛菩薩大  
雲不退水光陀羅尼復有諸佛菩薩大雲不退無盡

水藏陀羅尼復有諸佛菩薩大雲不退水性月光陀羅尼復有諸佛菩薩大雲不退水光體陀羅尼復有諸佛菩薩大雲不退不可思意大海王陀羅尼善男子是名三十六種不退智寶無邊心行意入陀羅尼爾時衆中有一天女名曰寶鬘上升虚空高七多羅樹兩種種華塗香末香旛蓋妓樂以供養佛說偈讚曰

如來大醫王 金剛身不壞 意等慧殊勝  
戒淨愍衆生 除斷諸煩惱 猶如日破暗  
今說陀羅尼 如雲降大雨

大雲初分密語捷度第四

爾時大雲密藏菩薩言世尊一切衆生無明所盲唯願如來廣開顯示諸佛密語然深智燈作大明導佛言善哉善哉善男子諦聽諦聽善思念之吾當爲汝然大法燈此經中有諸佛菩薩二十三種密語道迹入不狂行大方法方便解脫門斷我我所密語所入行解脫門可畏色不可畏色不色密語所入解脫門貪求不得密語所入解脫門斷界有界無界密語門有無明無無明有無無明密語門有貪無貪者斷貪密語門有愛無愛者斷愛密語門有繫無繫者斷繫密

語門有瞋無瞋者斷瞋密語門有暗大暗有光密語門有鈍無鈍有利大利密語門有破有析有壞密語門有苦有樂無有受者密語門有慈無慈密語門有施無受者有大施主密語門有罵無受者斷罵密語門有淨無淨斷一切淨密語門有等等無等斷一切等密語門有放逸無放逸斷放逸不放逸密語門空不空非空非不空如來密語門常無常非常非無常如來密語門我無我非我非無我如來密語門愛無愛非愛非無愛如來密語門善男子是名二十三種密語道迹入不狂行大法方便解脫門爾時衆中有一

天子名曰衆愛與無量天子上升虚空高七多羅樹兩諸華香旛蓋妓樂以供養佛說偈讚曰

如來深密語 二乘所不解 爲衆故宣說  
悉令得安樂

大雲初分轉生有藏捷度第五

爾時大雲密藏菩薩言世尊有十神通行人有生密行藏微妙光王法門唯願如來分別廣說佛言善哉善哉善男子諦聽諦聽善思念之吾當爲汝廣宣分別此經中有諸佛菩薩十有生樂王法門復有有生求喜法門復有有生虛渴法門復有有生樂說法門

復有有生安門法門復有有生願法門復有有生稱  
法門復有有生體王法門復有有生善王法門復有  
有生無善不染行藏微妙法王法門善男子是名十  
神通行入有生行藏微妙光王法門時大眾中有一  
天女名曰愛光以諸天華種種雜香旛蓋妓樂以供  
養佛而讚歎曰

我今稽首禮 不生於諸有 方便行諸趣  
普爲一切衆 如來心自在 是故其身常

爲衆轉生死 如華無所染

大雲初分得轉生死業煩惱捷度第六

爾時大雲密藏菩薩言世尊有十生死煩惱業因得  
心定願藏法門唯願如來廣爲衆生分別解說佛言  
善哉善哉善男子諦聽諦聽善思念之吾當爲汝開  
示解說此經中有得生死煩惱因果實法門復有生  
死因樂王法門復有生死莊嚴住心法門復有生死  
喜地法門復有生死期法門復有生死正見法門復  
有生死眴法門復有生死衣法門復有生死久住法  
門復有生死光明法門善男子是名十生死煩惱業  
因得心定願藏法門爾時衆中有龍王名曰無毒以  
諸雜香上妙諸華旛蓋妓樂供養於佛卽說讚曰

爲諸衆生故 顯示生死義 佛無煩惱業

爲衆故處之

大雲初分智狂入捷度第七

爾時大雲密藏菩薩言世尊有十種智狂不可思議神通王所入法門唯願如來廣開分別佛言善哉善哉善男子諦聽諦聽善思念之吾當爲汝分別解說此經中有得大安隱法門無勝勝神通王法門無稱稱光所入法門無量量光所入法門菩提時法門期光法門高梯法門寬腹法門持一切衆生法門現在光法門善男子是名十種智狂不可思議神通王所入法門於是衆中有一天女名曰善鬘以種種雜華上妙諸香旛蓋妓樂以供養佛卽說讚曰

佛心難思議 智身亦復然 爲化衆生故

廣開此法門

大雲初分解脫轉福德藏法門捷度第八

爾時大雲密藏菩薩言世尊有十智甚深入無畏行法王法門唯願如來廣分別說佛言善哉善哉善男子諦聽諦聽善思念之吾當爲汝分別解說有解脫一切惡法法門虛空藏法門甚深安入法門細針法門海不動法門智燈法門身口法門斷入一切煩惱

法門堅意入法門淨意無礙法門善男子是名甚深  
十智甚深入無畏行法王法門時大衆中有一天女  
名金光明以種種襍華上妙諸香旛蓋妓樂以供養  
佛卽說讚曰

如來金色身 智寶爲瓔珞 善法之寶聚

猶須彌草木

大雲初分解脫有德轉藏捷度第九

爾時大雲密藏菩薩言世尊有十種大雲見流不可  
思議功德寶藏法門唯願如來分別解說佛言善哉  
善哉善男子諦聽諦聽善思念之吾當爲汝分別演  
說有樂慈藏法門樂悲藏法門樂喜藏法門樂捨藏  
法門實水流藏法門大海行法門如來所說法流法  
門時入藏法門想意寶入藏法門一切大法聚法門  
善男子是名十種大雲見流不可思議功德寶藏法  
門時大衆中有一天子名智愛樂以種種雜華上妙  
諸香旛蓋妓樂以供養佛卽說讚曰

如來無生滅 佛法難測量 衆生無明覆

廣演於法界

大雲初分轉功德行捷度第十

爾時大雲密藏菩薩言世尊有十種雨流不可思議

功德藏法門唯願如來分別解說佛言善哉善哉善男子諦聽諦聽善思念之吾當爲汝廣宣分別善男子有雨罔法門有雨寶王法門有雨大海王法門有雨塵法門有雨斷毒法門有雨滿安樂法門有雨體法門有雨種種正見法門有雨功德法門有雨涼藥法門善男子是名十種雨流不可思議功德藏法門時大衆中有一天子名虛空雷持諸華香幡蓋妓樂以供養佛卽說讚曰

諸佛如來說 上妙微密藏 能令一切衆  
永度煩惱流 斷滅生死苦 一切永無餘

深自覺悟得 涅槃常樂俱 如來天中天  
成就無量德 今說大雲經 爲衆發道心

大雲初分大雲虛空生捷度第十一

爾時大雲密藏菩薩言世尊有十種大雲得虛空定法門唯願如來善分別說佛言善哉善哉善男子諦聽諦聽善思念之吾當爲汝分別解說有善法王法門見性法門智無勝王法門無憍慢法門無盡意法門不可思議法門無礙法門甚深法門質直法門虛空相法門善男子是名十法門時大衆中有一天女名妙族生持諸香華幡蓋妓樂以供養佛卽說讚曰

如來深密藏 衆生所不解 唯願爲一切  
分別令淺易

大雲初分電光轉捷度第十二

爾時大雲密藏菩薩言世尊有十種大雲電光法門  
唯願如來廣分別說佛言善哉善哉善男子諦聽諦  
聽善思念之吾當爲汝分別解說有六通法門功德  
法門寶光法門虛空精進法門藏法門戒調法門功  
德藏法門斷疑法門瑠璃意法門清淨法門功德甚  
深大海法門壞一切結法門金垢法門梵本  
長三善男子  
是名十法門時大衆中有一天女名曰善喜持諸華

香旛蓋妓樂以供養佛而讚歎曰

如來大醫王 無身方便身 無礙如虛空

廣說大雲經

大雲初分電轉捷度第十三

爾時大雲密藏菩薩言世尊有十種寶電行法門唯  
願如來廣開分別佛言善哉善哉善男子諦聽諦聽  
善思念之吾當爲汝分別解說有電光寶王法門利  
智慧法門智慧能壞法門智初法門智海法門法疑  
法門吉祥法門法鼓法門須彌山法門能壞暗法門  
風等行法門梵本  
長一善男子是名十法門爾時衆中有

一天女名恒河神持諸香華幡蓋伎樂以供養佛而讚歎曰

無畏無我心 無貪慳眾生 以大方便故  
而為一切世 如來功德力 故令我得知  
無上無邊身 不可得思議 我聞是經已

永斷諸煩惱

大雲初分神通捷度第十四

爾時大雲密藏菩薩言世尊有十種大雲電光幻法門唯願如來廣分別說佛言善哉善哉善男子諦聽諦聽善思念之吾當為汝分別解說善男子有調幻

法門調藏法門樂法法門求法法門燒結法門生一切法法門斷諸諍訟法門能消煩惱法門上高法門念無盡法門度一切眾生法門梵本長一善男子是名十法門時大眾中有一天女名曰大喜持諸華香幡蓋伎樂以供養佛以偈讚曰

如來大神通 其身無動轉 為眾斷生死

故說大雲經

大雲初分寶電捷度第十五

爾時大雲密藏菩薩言世尊有十種入神通法門唯願如來分別解說佛言善哉善哉善男子諦聽諦聽

善思念之今當爲汝分別解說善男子有寶電法門  
電等法門電莊嚴王法門電燈法門電藥法門電同  
法門電無盡意法門電上法門電上容法門電甚深  
法門善男子是名十種法門爾時衆中有一天女名  
曰嚴飾自喜持諸香華幡蓋妓樂以供養佛卽說讚

曰  
世尊天電王 天中天法雨 知諸煩惱業  
而能永斷之 凡夫結無邊 輪轉受生死  
菩薩無煩惱 故不至諸趣  
大雲初分金剛智捷度第十六

爾時大雲密藏菩薩言世尊有十智金剛行大智法  
門唯願如來廣分別說佛言善哉善哉善男子諦聽  
諦聽善思念之吾當爲汝分別解說有神通寶聚法  
門喜王法門神通平等法門白鷺聲法門虚空無礙  
法門藥王法門法旛法門甚深大海法門不動法門  
無邊光法門不可思議法門無量劫法門梵本善男  
子是名十法門時大衆中有一天女名深智愛持諸  
香華幡蓋妓樂以供養佛卽說讚曰

如來無上王 無生亦無滅 爲諸衆生故  
示現於生滅 眞實常不變 爲衆說無我

其身如金剛 不可得沮壞

大雲初分無盡捷度第十七

爾時大雲密藏菩薩言世尊有十無盡行人神通法門唯願如來廣分別說佛言善哉善哉善男子諦聽諦聽善思念之吾當爲汝分別解說有甘露意入法門安寶法門樂法門喜法門甚深精進法門意行法門無盡樂法門常喜樂法門善男子是名十法門

梵本

少爾時衆中有一天女名大寶輪持諸香華旛蓋妓

樂以供養佛卽說讚曰

如來無貧富 其身無觸礙 憐愍一切故

樂說大乘經

大雲初分正行捷度第十八

爾時大雲密藏菩薩言世尊有十正道法門唯願如來廣分別說佛言善哉善哉善男子諦聽諦聽善思念之吾當爲汝分別宣說有深廣行法門健行法門現力法門捷勝法門一切天入法門入一切時法門不染一切時法門一切道喜法門斷一切惡道法門大海常潮法門大海神通法門

梵本

長一善男子是名十

法門爾時衆中有一天女名曰善得持諸香華旛蓋

妓樂以供養佛卽說讚曰

如來無上尊 修習於正道 雖成堅固藏  
其心初無怯 慈愍於衆生 及爲我等故  
今於此寶座 宣說如是經

大雲初分師子吼捷度第十九

爾時大雲密藏菩薩言世尊有十種甚深師子吼行  
法門唯願如來分別解說佛言善哉善哉善男子諦  
聽諦聽善思念之吾當爲汝分別解說有一切味吼  
法門一切味喜法門時神通王法門蓮華法門喜地  
法門大喜地法門四威儀法門聖行法門淨法門一  
切法體法門善男子是名十法門時大衆中有一天

女名微妙聲持諸香華幡蓋妓樂以供養佛而說讚

曰善思念之吾當爲

無上智微妙 猶如大海水 其力難思議

故能師子吼 爲諸衆生故 生於憐愍心

大雲今說方等經 其意無所畏

大雲初分師子吼神通捷度第二十

爾時大雲密藏菩薩言世尊有十師子吼神通法門  
唯願如來分別解說佛言善哉善哉善男子諦聽諦  
聽善思念之吾當爲汝分別解說有光法門法蜂法  
門法鼓法門法寶法門法藏法門法力法門法動法

門三市法門大地法門難近法門一切瓔珞法門梵本  
善男子是名十法門時大衆中有一天子名師子長  
吼持諸香華幡蓋妓樂以供養佛而說讚曰

如來無因喻 無勝無有邊 爲諸衆生故

方便師子吼

大雲初分善方便捷度第二十一

爾時大雲密藏菩薩言世尊有十入世間方便法門  
唯願如來廣分別說佛言善哉善哉善男子諦聽諦  
聽善思念之吾當爲汝分別解說有生王入法門畢  
竟多方便入法門信心入法門師子神通法門世界

非世界法門時入法門善不善法門能調惡人法門

有德王入法門得一切恭敬法門下業行法門

梵本長一

善男子是名十法門是時衆中有一天子名婆羅呵

迦持諸華香幡蓋妓樂以供養佛而說讚曰

如來方便入涅槃 其身不動亦不滅

所入禪定不可議 衆生不解謂永滅

大雲初分神通捷度第二十二

爾時大雲密藏菩薩言世尊有十神通寶藏入法門  
唯願如來分別解說佛言善哉善哉善男子諦聽諦  
聽善思念之吾當爲汝分別解說有法周羅法門大

神通法門寶香藏法門師子吼入聚法門破法相法  
門梅檀涼法門無相法門無語法門蓮華法門稱法  
門善男子是名十法門是時衆中有一天子名增長  
有德持諸華香旛蓋伎樂以供養佛卽說讚曰

三千大千界 佛於法自在 法身不可見  
爲衆現相好

大雲初分金翅鳥捷度第二十三

爾時大雲密藏菩薩言世尊有十金翅鳥神通所入  
法門唯願如來分別解說佛言善哉善哉善男子諦  
聽諦聽善思念之吾當爲汝分別宣示有能壞婆修

吉龍王力神通王法門自在力入法門喜入法門開  
勇入法門大海時入法門能壞大山法門能壞風力  
法門長見法門能壞一切毒法門得寶鬘法門善男  
子是名十法門是時衆中有一天子名深淨行持諸  
華香旛蓋伎樂以供養佛卽說讚曰

如來大法王 慧眼喻千日 定根金剛手  
能壞諸煩惱

大雲初分大捨捷度第二十四

爾時大雲密藏菩薩言世尊有十大捨時微妙神通  
王法門唯願如來分別解說佛言善哉善哉善男子

諦聽諦聽善思念之吾當爲汝分別解說有無礙力甚深法門戒住法門戒廣王法門戒界王法門實乳流法門功德流微妙法門慈力流法門忍辱流法門喜力流法門捨力流法門善男子是名十法門是時衆中有一天子名寶貴德持諸華香旛幢妓樂以供養佛卽說讚曰

禮佛無量力 常住不壞身 爲諸衆生故  
說種種法界

大雲初分無畏捷度第二十五

爾時大雲密藏菩薩言世尊有十無所畏大神通所入法門唯願如來分別解說佛言善哉善哉善男子諦聽諦聽善思念之吾當爲汝分別解說有無所畏力神通法門不希樂根法門寶聚法門十有德法門淨浣法門淨光行法門淨寶光法門喜入法門淨等法門電光法門善男子是名十法門是時衆中有一天子名寶慧星持諸華香旛蓋妓樂以供養佛卽說讚曰

如來祕密藏 甚深如大海 爲諸衆生故  
淨行於法界

大雲初分入行捷度第二十六

爾時大雲密藏菩薩言世尊有十入行法門唯願如  
來分別解說佛言善哉善哉善男子諦聽諦聽善思  
念之吾當爲汝分別解說有人藏法門正行法門正  
實法門吉稱法門稱法門常喜法門日鬘法門悲力  
法門忍辱法門常淨法門善男子是名十法門是時  
衆中有一天子名寶正光持諸華香旛蓋妓樂以供  
養佛卽說讚曰

如來智慧海 甚深難可測 普爲衆生故

今說大雲經

大雲初分至心捷度第二十七

爾時大雲密藏菩薩言世尊有十種至心所入法門  
唯願如來分別解說佛言善哉善哉善男子諦聽諦  
聽善思念之吾當爲汝分別解說有住善界法門大  
海智法門智潮法門神通行法門虛空神通法門無  
熱法門初成法門隨行法門施喜法門善至心法門  
善男子是名十法門是時衆中有一天子名波頭摩  
智持諸華香旛蓋妓樂以供養佛卽說讚曰

如來無見頂 無勝無有上 今放大光明

廣爲諸衆生

大雲初分勇力捷度第二十八

爾時大雲密藏菩薩言世尊有十勇王大微妙法  
門唯願如來分別解說佛言善哉善哉善男子諦聽  
諦聽善思念之吾當爲汝分別宣說有健勝因行法  
門普楞嚴法門勇健神通法門健力法門健歸法門  
衆生具足法門智堅健行法門壞懶惰法門廣力法  
門健調光法門健意法門梵本  
長一善男子是名十法門  
是時衆中有一天子名曰勇武持諸華香幡幢妓樂  
以供養佛卽說讚曰

眷屬不可壞 猶如金剛寶 摧伏魔官屬  
爲衆說是經

大雲初分善提度第二十九

爾時大雲密藏菩薩言世尊有十種善行大神通王  
所入法門唯願如來分別解說佛言善哉善哉善男  
子諦聽諦聽善思念之吾當爲汝分別說之有善寶  
調法門善聚法門善堂法門善行法門善意法門善  
德法門善淨法門善調光法門一切善行瓔珞法門  
梵本  
少一善男子是名十法門是時衆中有一天女名曰  
善護持諸香華幡蓋妓樂以供養佛卽說讚曰

成就於善相 安坐善妙牀 廣爲諸衆生  
敷演無上法

大雲初分神通捷度第三十

爾時大雲密藏菩薩言世尊有十三神通藏得開示  
法門唯願如來分別解說佛言善哉善哉善男子諦  
聽諦聽善思念之吾當爲汝分別宣示有樂神通窟  
法門喜神通窟法門大喜神通窟法門行神通窟法  
門師子神通窟法門等神通窟法門示神通窟法門  
悲神通窟法門捨神通窟法門梵本少四善男子是名十  
三法門是時衆中有一天女名大海意持諸華香旛  
蓋妓樂以供養佛卽說讚曰

菩提樹常住 弟子樂依止 安根不動搖

故得生定芽 獲果常不變 是故稽首禮

大雲初分智捷度第三十一

爾時大雲密藏菩薩言世尊有十智初行法門唯願  
如來分別說之佛言善哉善哉善男子諦聽諦聽善  
思念之吾當爲汝分別解說有法增長法門喜食法  
門無盡意法門貪神通法門施舟法門不樂世間法  
門莊嚴地法門莊嚴界法門樂調法門住持法門善  
男子是名十法門是時衆中有一天女名須曼那華  
持諸華香旛蓋妓樂以供養佛卽說讚曰

如來戒無上 智慧無上上 憐愍衆生故

廣說大雲經

大雲初分智寶藏捷度第三十二

爾時大雲密藏菩薩言世尊有十智寶藏法門唯願  
如來分別解說佛言善哉善哉善男子諦聽諦聽善  
思念之吾當爲汝分別宣示有善持寶藏法門法持  
法門恭敬法門心持法門調王法門正精進法門大  
海寶藏法門樂吉法門智果法門大吉法門成就功  
德法門端正法門持戒精進法門梵本長三善男子是名  
十法門是時衆中有一天女字蓮華鬘持諸華香楯  
蓋效樂以供養佛卽說讚曰

如來大智海

我今至心禮

深定祕密藏

大悲故宣說

如來旣自獲

常樂我淨等

亦復令衆生

同已之所得

大雲初分施捷度第三十三

爾時大雲密藏菩薩言世尊有十正智微妙寶藏唯  
願如來分別解說佛言善哉善哉善男子諦聽諦聽  
善思念之吾當爲汝分別解說有寶藏法門淨藏法  
門淨樂法門施樂法門施目法門深藏法門深法莊  
嚴法門正見法門愍一切衆生法門梵本少一善男子是  
名十法門是時衆中有一天女字法寶樂持諸華香

旃蓋妓樂以供養佛卽說讚曰

如來大施主 莊嚴大施聚 施一切衆生

不觀田非田

大雲初分福田捷度第三十四

爾時大雲密藏菩薩言世尊有十種福田種子法門  
唯願如來分別解說佛言善哉善哉善男子諦聽諦  
聽善思念之吾當爲汝分別解說有寶行勝法門寶  
流雨法門寶行聚法門寶功德聚法門寶正意法門  
寶目法門寶意法門寶光法門寶燈法門寶電法門  
無盡意法門寶住法門一切寶田法門

梵本  
長三

善男子

是名十法門是時衆中有一天子名曰寶雨持諸香

華旛蓋妓樂以供養佛卽說讚曰

諸佛等正覺 是世之福田 大慈悲憐愍

一切諸衆生 能了田非田 故名阿黎呵

大雲初分正法捷度第三十五

爾時大雲密藏菩薩言世尊有十種真實神通安樂  
樂王所入法門唯願如來分別解說佛言善哉善哉  
善男子諦聽諦聽善思念之吾當爲汝分別解說有  
不動法門住根法門不動樂法門深住法門不可思  
議法門不可思議聚解脫法門樂意法門不可思議

住法門如來智印法門一切大海無盡意法門善男子是名十法門是時衆中有一天子名曰大光持諸香華旛蓋妓樂以供養佛卽說讚曰

諸佛婆伽婆 所說微妙法 所爲諸衆生

悉皆難思議

大方等大雲經卷第二

音釋 瓊瑋瓊古回切 瑋倉各切 駒輪間切 鞭魚孟切 與硬同

吳江居士周祇施刻此衆所先祖考周用離苦得樂修證菩提 金臺普安寺沙門劉旻對長洲徐普書上元李茂松刻 萬曆己亥夏閏月徑山寂巽庵識

大方等大雲經卷第三

北涼天竺三藏法師曇無讖譯

大雲初分如來涅槃捷度第三十六

於是衆中有大梵王名曰健行持諸供具供養於佛合掌恭敬右繞三匝上升虛空高七多羅樹白佛言世尊大乘經典凡有幾種三昧總持所修行道祕密之藏樂說無礙如來境界國土世間復有幾種如來大慈憐愍一切故我今日敢生此問願二足尊哀矜宣說說已我當頂戴受持時有天子名無盡意在大衆中承佛威神卽爲梵天而說偈言

善哉大梵王 問佛真實義 佛當如實答

廣度諸衆生 應當至心聽 恭敬而尊重

一一方等經 恒沙義難解 如來大法王

廣開闡法界 佛得總持河 非二乘所解

大梵大乘義非唯一種乃至萬種假使有人智如阿難所得壽命如恒河沙不能受持知其義理復使是人其舌辯利數如恒沙說亦不盡何以故是大乘經其義深邃不可思議不可稱量境界難知過去未來現在諸佛說其句義猶不可盡梵天譬如醫師爲療病故所說藥方亦不能盡諸佛世尊亦復如是梵天

譬如女人唯有一子欲令長大漸令服酥諸佛世尊亦復如是梵天已爲衆生興發此問我當至心聽受其義爾時大雲密藏菩薩白佛言世尊此經中說四百三昧其義甚深難可得解唯願如來分別解說佛言善哉善哉善男子如汝所問欲療衆生雜惡穢垢令得忍辱正信之心正精進心念心定心欲令未來薄福之人生福德故發此問善男子若有國土城邑聚落四部之衆受持讀誦書寫解說如是經者時旱則雨雨過則止善男子隨有國土其中衆生受持讀誦書寫解說聽此經者當知是人得金剛身何以

故是經典中有神呪故爲衆生故三世諸佛悉共宣說

郁究隸 牟究隸 頭氏 比頭氏 陀尼羯菴

陀那賴氏 陀那僧啞兮

若有四衆讀誦此呪則爲諸佛之所稱讚若有國土欲祈雨者六齋之日其王應當淨自洗浴供養三寶尊重讚歎稱龍王名善男子四大之性可令變易讀持此呪天不降雨無有是處汝先所問四百三昧義至心諦聽當爲汝說善男子此經中有諸佛菩薩甚深淨水大海三昧非諸聲聞緣覺所知故名甚深能斷一切生死渴乏故名淨水邊不可得故名大海諸佛世尊同平等故故名三昧若有菩薩具是三昧則得常樂我淨之身得多聞海多聞寶藏於菩提心無有動轉不退佛慧常住之身無有變易心無疑礙不離法雨常遇三寶值善知識成就一切真正福德善男子汝當受持如是三昧持已則得具足成就無量功德復次善男子復有甚深淨水大海所入三昧無有三昧而能宣說是三昧相故名甚深洗濯生身故名爲水無能得底故曰大海得不動身常樂我淨故名爲入入畢竟故故名三昧善男子若有菩薩具是

經

三昧則能變爲諸天形像見事梵者卽作梵像爲破  
梵事而心不著見事自在天作自在像見事八臂作  
八臂像見事韋馱作韋馱像見事天母作天母像見  
事鬼者卽作鬼像雖示如是種種形像爲壞彼見心  
實無著見有屠者卽現屠像爲欲化彼令不殺生酒  
家乃至旃陀羅像亦復如是見有博奕戲笑之處悉  
現其像爲斷貧窮現畜妻息奴婢僕從而其內心常  
修梵行雖服寶飾心常清淨示現服食甘美衆饌內  
常法喜以自克潤入諸姪舍爲化欲惡諸不善者博  
士卜筮鳥鷺之身乃至一切畜生襟類亦復現入一

切形殘身不具足爲欲宣說身過患故乃至九十五  
種邪道隨示其像破彼見故示現自身四百四病爲  
治衆生內外病故讀誦外書解種種語言示現奴婢  
僕從男女老少之像及示生老病死等像爲欲調伏  
諸衆生故能解一切鳥獸等語現作香華藥草果菴  
或示王身王子大臣長者身像或示沙門婆羅門像  
帝釋天王轉輪聖王日月等像所以示現四大天王  
爲欲擁護四天下故示現諸佛自在神通終不畢竟  
入於涅槃變作衆色不壞色性雖得往生諸佛淨土  
終不分別國土之相獲得諸佛甚深三昧而於法界

無所分別爲人天主心無僞慢雖說夢事不見夢相  
外現魔事實無魔業行於世間世法不汙猶如蓮華  
處汙不染善男子如是之果名爲成就甚深大海所  
入三昧爾時衆中有婆羅門名曰善德白佛言世尊  
如來之法甚深祕密爲諸衆生分別演說而是薄福  
鈍根愚癡提婆達多不聽不受不知恩分純與六羣  
弊惡比丘同其所行增長地獄出佛身血破壞衆僧  
生於釋種增長僞慢實非人類彊名爲人察其行迹  
畜生無別復從無量阿僧祇世常於如來生惡逆心  
其有施者無有果報自所修善亦不成就如尼乾子

等無差別尼乾子說無受無施提婆達多亦復如是  
真是魔黨非佛眷屬何以故常於如來起害心故雖  
名沙門無沙門義猶如袈裟裹覆利刀實是禿人名  
爲無命所有徒衆亦復如是實非世尊作世尊想世  
尊如來若是一切智者何故聽此弊惡之人出家剃  
髮受具足戒如來所說普令衆生生於善根是人何  
故獨不得生如來慈哀常以樂說爲諸衆生廣宣正  
法聞者蒙潤善根開敷提婆達多何故不得預斯利  
益如來性淨身淨心淨眷屬淨何故衆中而有此  
輩爾時大雲密藏菩薩承佛神力語善德言善哉善

哉大婆羅門一切聲聞辟支佛等於是事中都不能問汝今乃能諮問是義至心諦聽我當承佛威神道力爲汝廣說汝不應言提婆達多不知恩分是人知恩非不知也雖與六羣同其所行不名爲惡提婆達多不可思議所修業行皆同如來如來業行卽是提婆達多業行一切衆生不能開顯如來世尊真實功德提婆達多能開示人令阿僧祇無量衆生安住善根如來業行非地獄種云何而言提婆達多是地獄人汝言同於六羣所行汝今當知六羣比丘實非弊惡所行之法亦同佛行大婆羅門如來身血實無有

出提婆達多亦不能出若言樹影有出血者無有是處如來之身亦復如是若言出血當知卽是善權方便不可思議或婆羅門釋迦如來種姓清淨如紺瑠璃所有弟子無有毀禁我亦不見如來弟子有破戒者如來所說無上正法實令聞者生於善根非不生也如來大衆成就持戒悉入佛境徒衆眷屬如梅檀林純以梅檀而爲圍繞不可沮壞如金剛山亦不見有能沮壞者有怖畏者則可破壞如來弟子永無憂怖若無憂怖云何可壞不可破壞如師子羣如來法王如師子王純以師子而爲眷屬如是眷屬難可測

度非是聲聞緣覺境界不可毀滅如來覆火如來無  
上一切智入若聽剃髮受具戒者終無毀禁一切衆  
生皆入如來所知境界是故如來名一切智提婆達  
多具足如是不名壞僧大婆羅門假使千萬無量諸  
魔亦不能壞若言弊惡提婆達多壞衆僧者當知卽  
是善方便也云何而言行同畜生提婆達多眞實生  
於釋迦如來淨種姓中不生畜生若言釋種作諸惡  
者無有是處提婆達多所行惡行爲欲顯示釋迦如  
來功德力故釋種中生名禿人者亦無是處提婆達  
多善能護持解脫淨戒云何而言尼乾子耶有惡欲  
者乃名惡人提婆達多心無惡欲云何而言惡比丘  
耶修行如來善方便者提婆達多卽其人也大婆羅  
門若有人言提婆達多集地獄業當知卽是菩薩業  
也菩薩業者卽是神通爲化衆生故在地獄當知實  
亦不處地獄譬如二人道路共行後各別去一東一  
西若言是人故和合者亦無是處若言如來提婆達  
多相遠離者亦無是處大婆羅門有人殺生造作惡  
業法應無量百千世中地獄受果有人修善法應無  
量百千世中天上受報有修善者地獄受果行惡之  
人天上受報此乃諸佛如來境界非諸聲聞緣覺所

知如來成就無量微妙真實功德云何而言提婆達  
多實無量世中於如來所生惡逆心提婆達多實無  
害心何以故是人真實決定了知善惡報故生一念  
惡無量世中地獄受報以是義故知提婆達多終不  
造惡如來已於無量世中永斷諸惡云何衆生能於  
如來起惡心耶若言提婆達多是地獄人云何得與  
如來法王同一種姓地獄衆生得與如來同眷屬者  
亦無是處若言提婆達多無量世中造作諸惡應無  
量世地獄受報云何得與如來一處若與如來同一  
處者當知是人非是弊惡若提婆達多真實惡人云

何得與如來和合如彼二人東西路乖理無和合提  
婆達多隨順佛語聞東則東不違聖旨云何當名地  
獄人耶若令至東故違西去則不得名非地獄人若  
言提婆達多地獄人者是無惡人所以者何地者名  
人獄者名天往來人天名地獄人復次地者名常獄  
名無相提婆達多亦常無相故名地獄復次地名爲  
樂獄者名斷樂斷生死故名地獄復次地者名善方  
便獄名能說說善方便故名地獄大婆羅門如來世  
尊有善方便復能宣說不名地獄云何得名提婆達  
多爲地獄人提婆達多所有境界實非聲聞緣覺所

知大婆羅門如來世尊常所稱讚黃頭大士卽是提婆達多比丘六羣比丘亦大菩薩提婆達多與共同行云何得名地獄人耶如栴檀樹栴檀圍繞如香象蹙蹋非驢所堪還是香象之所能忍大婆羅門如來世尊大香象王亦復如是所說深義非是二乘之所能知還是香象諸大菩薩乃能受持提婆達多成就如是無量功德汝應懺悔恭敬供養尊重讚歎大婆羅門若比丘比丘尼優婆塞優婆夷能知提婆達多功德了了不疑當知是人真佛弟子得佛功德二分之一得佛一目得佛半身大婆羅門提婆達多所有功德一切衆生所不能知如來功德所有境界一切衆生亦不能知復不能見如來法身大婆羅門提婆達多真實能知如來所有微妙功德聲聞緣覺實所不知唯有提婆達多了了不疑亦能示現如來所現無量神通能示衆生如來所行知佛如來所有國土提婆達多是大丈夫如來所遊在在處處提婆達多亦隨逐行以是義故名大丈夫諸佛如來境界甚深祕密之言不可思議唯有提婆達多比丘能得了知如來今者當開密語仁可善聽爾時大衆異口同音而讚頌曰

假使魔波旬 其數無有量 盡其神通力  
不能壞衆僧 如來無上尊 大慈憐愍心  
爲諸衆生故 示現業果報

爾時世尊讚歎大雲密藏菩薩摩訶薩言善哉善哉  
汝今快說提婆達多真實功德一切聲聞辟支佛等  
不能解了大乘方等功德勢力汝將欲壞一切衆生  
所有疑心是故開顯提婆達多菩薩功德復次善男  
子此經復有諸佛菩薩深進大海水潮三昧若有菩  
薩成就具足是三昧者須彌山王高犬堅斲能以口  
吹令其碎破猶如微塵入葶藶糲而葶藶糲亦不增

長四大天王亦不驚怖不破不壞不自覺知所安之  
處三十三天亦復如是善男子是名菩薩成就具足  
深進大海水潮三昧復次善男子若有菩薩成就具  
足是三昧者以四大海水入一毛孔不燒竈鼉龜龍  
魚鼈水性之屬壽命如常無有損夭諸龍王阿脩羅  
乾闥婆不自覺知所至之處能以三千大千世界安  
置右掌斷取大地如陶家輪擲置他方恒沙界外其  
中衆生都不覺有往來之想取彼世界安置此土亦  
復如是爾時善德以諸香華旛蓋妓樂供養於佛合  
掌恭敬白佛言世尊大慈憐愍一切如羅睺羅今欲

啓請唯願聽許爾時世尊默然不答是時衆中有梨  
車童子名曰一切衆生樂見語善德言如來默然已  
不相許我今當答隨疑致問婆羅門言梨車我曾從  
他聞如是義若能供養如來舍利如芥子許福報應  
得忉利天主梨車是大雲經其義甚深如來密語難  
可得解非諸聲聞緣覺所知何況我等邊地之人我  
今欲得如來舍利如芥子許恭敬禮拜冀處忉利爲  
彼天主我從昔來常有此願爾時梨車卽說偈言

假使恒河中 駛流生蓮華 拘枳羅烏白

舍利乃可得 假使龜生毛 任作僧伽梨

冬日能銷冰 舍利乃可得 假使蚤子腳

堪任作橋梁 能度一切衆 舍利乃可得

假使水中蛭 忽然生白齒 大如香象牙

舍利乃可得 假使兔生角 堪任作椽墜

高至淨居天 舍利乃可得 假使鼠蟲等

緣於兔角椽 在上而食月 舍利乃可得

假使蠅能飲 鍾石淳好酒 迷荒而耽醉

舍利乃可得 假使驢口脣 形如頻婆果

善能歌詠舞 舍利乃可得 假使烏角鴉

同共一樹棲 飲食不相離 舍利乃可得

假使棘刺葉 周徧覆三千 大千世界上  
舍利乃可得 假使小舟船 能載須彌山  
度於大海水 舍利乃可得 假使小鳥雀  
背銜大香山 移置於他處 舍利乃可得  
時婆羅門即談偈頌答黎車言

善哉梨車子 能知深方便 今當至心聽  
我說佛功德 佛境難思議 所得已畢竟  
諸佛常無變 是故無生處 諸佛色平等  
是名佛法界 如來非作法 亦復非有生  
如來金剛身 不可得破壞 以是故舍利

真實不可得 如來無舍利 乃至如芥子  
無有血肉骨 云何有舍利 如來爲衆生  
現受方便身 諸佛身常住 法界亦復然  
隨應諸衆生 方便爲說法 亦隨其所宜  
而現種種身 若佛有慈愍 普及諸衆生  
何故不見爲 分身施舍利

爾時衆中有一天女名曰淨光復以香華旛蓋效樂  
供養於佛合掌恭敬白佛言世尊如是二賢成就甚  
深微妙智慧能開如來祕密之藏從何處來唯願演  
說佛言善哉善哉天女汝爲衆生故問是義諦聽諦

經 天女善大靈靈卷三 七

聽吾當說之如是二人是佛真子如香象王是大丈夫爲衆生故樂處生死知恩報恩我所護念善能護持諸佛種性爲佛重任熾然法燈天女過去無量億那由他阿僧祇劫爾時有佛號同性燈如來應供正徧知明行足善逝世間解無上士調御丈夫天人師佛世尊時閻浮提多有衆生無量無邊不可算數悉皆成就安隱快樂無諸飢渴苦惱等患其地廣博清淨嚴事縱廣六萬八千由旬多有諸城七萬八千一大城七寶所作其城四壁有九萬卻敵爾時大城名曰寶聚卽是今之王舍城也時寶聚城有八萬千

億人同性燈佛出生彼城彼城所有無量衆生悉發阿耨多羅三藐三菩提心成就神通人中象王天女爾時如來在大衆中作師子吼宣說如是大雲經典時彼城中有王名曰大精進龍王王有夫人名曰護法有一大臣名法林聚爾時國王與其夫人及其大臣往彼佛所供養恭敬合掌作禮右繞三匝卻坐一面爾時同性燈佛知大精進龍王心中所念放大光明名無所畏王遇此光心得法喜爾時大臣承佛神力白佛言世尊如來舍利爲可得爾時世尊默然不答天女爾時大王爲正法故卽共大臣翻覆往反

論講舍利時佛聞已卽讚歎言善哉善哉彼佛衆中  
有大弟子字摩訶男心生善欲而作是念善哉大王  
善解如來甚深法界時佛卽爲時會大衆說王所解  
深法妙義大衆聞已皆生驚疑時佛卽告諸大衆言  
此王功德不可思議深不可測非是汝等所能得解  
爾時大王聞佛稱讚已之功德心大歡喜卽起供養  
右繞千匝以栴寶華用散佛上而復讚歎卽發願言  
未來當有釋迦如來興出於世以大方便示法滅時  
我當於中出家修道受持淨戒具大勢力見有破戒  
行惡比丘我當驅擯至於邊方無佛法處爲正法故

不惜身命爾時大臣復作是願釋迦如來以大方便  
現涅槃已我當於中作大國王護持如來無上正法  
見惡比丘唱令驅出有持法者恭敬供養是時夫人  
復作是願釋迦如來出現之時令我勢力能伏邪見  
時摩訶男復作是願使我爾時爲彼如來作大弟子  
得大神通於佛功德能師子吼天女如是四人今於  
我世爲法重任不但今日方於未來復當護持我之  
正法是時天女卽白佛言我今未知如是四人斯爲  
是誰唯願如來說其名字佛言善哉天女至心諦聽  
諦聽吾當爲汝分別解說爾時大臣卽今善德婆羅

門是是婆羅門於我滅後百二十年王閻浮提字阿  
叔迦住於波梨弗羅城中姓九耶氏得轉輪王所有  
福德二分之一於閻浮提得大自在護持正法大師  
子吼爲法流布大得舍利供養恭敬尊重讚歎見惡  
比丘治令修善天女復言唯願解說爾時佛告天女  
且待須臾我先當說汝因緣是時天女聞是說已  
卽生慚愧低頭伏地佛卽讚言善哉善哉夫慚愧者  
卽是衆生善法衣服天女時王夫人卽汝身是汝於  
彼佛暫得一聞大涅槃經以是因緣今得天身值我  
出世復聞深義捨是天形卽以女身當王國土得轉

輪王所統領處四分之一得大自在受持五戒作優  
婆夷教化所屬城邑聚落男女大小受持五戒守護  
正法摧伏外道諸邪異見汝於爾時實是菩薩爲化  
衆生現受女身是時王者卽今一切衆生樂見梨車  
子是深達正法甚深之義能開如來微密法藏護持  
佛法無所虧損時摩訶男者卽今大雲密藏菩薩是  
得我真身二分之一知恩報恩護持正法能答深義  
無所滯礙天女我今此衆雖有上智大迦葉等不能  
宣辯甚深之義如大雲密藏菩薩摩訶薩也爾時衆  
中有一天子字曰奇杖與千天子卽起向佛以諸華

香旛蓋妓樂供養於佛合掌恭敬以偈讚佛

大海可度量 須彌可稱知 如來法境界

難可得思量

說是法時無數千人發阿耨多羅三藐三菩提心爾時如來告善德言善哉善哉大婆羅門汝今善發歡喜之心得無上果大婆羅門從是南去度三十萬恒河沙等世界彼有世界名須曼那有佛世尊號淨光祕密如來應供正徧知明行足善逝世間解無上士調御丈夫天人師佛世尊常住在世爲化衆生轉正法輪彼從南去復度五十萬恒河沙等世界彼有世

界名法喜寶佛號法藏如來應供正徧知明行足善逝世間解無上士調御丈夫天人師佛世尊常住在世爲化衆生轉正法輪彼從南去復過六十萬恒河沙世界彼有世界名一切池佛號師子吼神足王如來應供正徧知明行足善逝世間解無上士調御丈夫天人師佛世尊常住在世爲化衆生轉正法輪從彼南去復過三十六萬恒河沙等世界彼有世界名曰華旛佛號高須彌十號具足乃至轉正法輪從彼南去復過八十萬恒河沙等世界彼有世界名曰寶手佛號法護十號具足乃至轉正法輪大婆羅門如

是諸佛世界嚴淨其土無有山陵塹阜石沙穢惡其地柔輒如迦陵伽衣世無五濁亦無女身二乘之人乃至無有二乘之名女人名字純諸菩薩摩訶薩等甘樂大乘護持大乘樂說大乘大婆羅門若有善男子善女人受持如是諸佛名號墮三惡道者無有是處必定當得阿耨多羅三藐三菩提大婆羅門以是義故我涅槃後是經當於南方國土廣行流布正法欲滅餘四十年當至北方北方有王名曰安樂見有受持書寫經卷讀誦說者隨時給施四事無乏爾時北方當有八萬四千衆生受持是經卷善男子若有

人聞如是經已放捨遠離無有是處若有善男子善女人頂戴受持諸佛名號若中兵毒水火盜賊無有是處除其宿業復次婆羅門若內四部若外衆生爲供養故爲怖畏故爲壞法故奉持如是諸佛名號終不墮於三惡道中若至三惡無有是處爾時善德復作是言世尊若有衆生聞是經名尚得如是無量善利況有受持讀誦書寫解說之者若得聞彼諸佛名號則爲已得無上大寶阿耨多羅三藐三菩提已在其手諸佛如來已到其舍其地金剛其身亦爾心堅不動不可移轉世尊我今亦當恭敬供養如是之人

佛言善哉善哉大婆羅門汝今善知善解如來功德之力若有衆生聞彼佛名敬信不疑無諸怖畏所謂王怖人怖鬼神無諸疾病常爲諸佛學道弟子八部闍婆王名曰喜見從坐而起往至佛所合掌恭敬白佛言世尊如來滅後何等衆生能受持是經廣令流布何等衆生不能受持令法毀滅爾時如來默然不答時大迦葉語喜見言善男子如來真實無有涅槃法無滅盡云何而言如來滅後誰受是經喜見王言大德一切衆生狂愚無智唯願大德宣說如來所以

不滅一切衆生癡暗所覆願然法燈令得開明我於未來亦當廣爲一切衆生開發是義唯願大德哀愍故說大迦葉言善男子如來法身不名肉身佛身金剛非破壞身成就具足無量功德方便之身不名食身如是之身云何言滅喜見王言大德我今定知如來世尊方便涅槃非畢竟滅爾時迦葉讚喜見言善哉善哉實如所說善男子大海可量如來功德不可稱知喜見王言如來何時當畢竟滅大迦葉言假使一切所有衆生乃至蚊蟻悉得阿耨多羅三藐三菩提入於涅槃如來爾時乃當涅槃喜見王言大德如

來成就如是無量無邊功德一切衆生何故不發阿耨多羅三藐三菩提心苦哉苦哉衆生薄福不知如來常住不變金剛之身非雜食身大德如是之身唯佛能知非諸聲聞緣覺所及迦葉復言善男子一切衆生悉有佛性得菩提心說是法時二萬二千天子發阿耨多羅三藐三菩提心異口同音而說偈言

如來不涅槃 眞法無有滅 爲諸衆生故  
示現有滅度 如來常不滅 爲衆方便說  
如來不思議 法僧亦復然

大雲初分增長捷度第三十七之一

爾時南方有諸天子其數無量從黑山中來至佛所以諸香華幡蓋妓樂供養於佛頭面作禮右繞三匝白佛言世尊如來今日說是經典南方世界無量無邊恒河沙等諸佛世尊亦說是經世尊如是經典名字何等善男子如是經典凡有三名一名大雲二名大般涅槃三名無想大雲密藏菩薩所問故名大雲如來常住無有畢竟入涅槃者一切衆生悉有佛性故得名爲大般涅槃受持讀誦如是經典斷一切想故名無想善男子有人親近無量恒河沙諸佛世尊於諸佛所受持淨戒供養恭敬尊重讚歎成大功德

然後乃得聞是經典雖得聞受不能廣說若於不可  
計不可數恒河沙等諸佛世尊受持淨戒乃至成大  
功德聞已則能分別廣說善男子正法欲滅是經當  
於閻浮提中具足流布佛涅槃後初四十年亦當流  
布正法垂滅餘四十年復當流布行惡之時謗方等  
時惡王治時我諸弟子毀禁戒時遭值荒亂世人輕  
時四部弟子不修身不修戒不修心不修慧無明狂  
癡習放逸時凡所造作同畜生行不隨和尚師長教  
時違反上座耆宿長老當爾之時我諸弟子於是經  
中不能信受輕笑譏訶互相訾懣云何邪見說爲方

等剃頭之人名爲沙門云何反讀邪見經書實非佛  
語爲利養故說爲佛語公於衆中唱如是言如此經  
者真是邪見非佛所說慎勿讀誦書寫受持爾時大  
衆卽共答言大德莫作是語此經相義實是佛說我  
今爲經當相供給我此弟子爲供養故素無信心受  
持誦說是名滅法復次天子未來之世法欲滅時我  
四部衆薄福少智不知厭足退失善根貧於法財無  
心親近佛法僧寶爲衣食故剃頭染衣其心麤獷如  
秃居士畜養奴婢金銀珍寶錢財珂貝瑠璃玻瓈貯  
聚穀米牛馬畜生田宅屋舍襍色臥具食肉嗜味背

捨諸佛成就十六不善律儀親近國王大臣長者受  
使鄰國通致信命受人供養反生惡心成就一切非  
沙門法非婆羅門法天子如是惡世惡比丘時爾時  
我當有一弟子持戒清淨少欲知足如大迦葉善能  
教化閻浮提內我弟子中習行惡者爲說正語不惜  
身命廣開如來深密祕藏讚歎持戒行頭陀者成就  
具足波羅提木叉稱美知足糞掃衣服廣爲惡人說  
如是言諸大德世尊不聽受畜一切不淨之物貪味  
食肉如來常讚持淨戒者呵責毀禁大德汝今若不  
受我語者我有大力勢能相降伏我此弟子福德力

故咸令一切信伏無違何以故是人已曾親近無量  
諸佛世尊廣修慈悲貪樂大乘護正法故爾時常有  
五萬八千諸善鬼神隨從侍衛爲欲守護佛正法故  
天子復言世尊我等未來亦當護是持法比丘佛言  
善哉善哉天子如汝所說法欲滅時當勤守護天子  
當爾之時我亦能以威神道力摧伏惡魔治惡比丘  
爾時十方無量諸佛亦同讚歎我此弟子爾時一切  
南方天子復以華香供養世尊白佛言世尊如是第  
子何時當出在何國土名字何等佛言善男子我涅  
槃後千二百年南天竺地有大國王名娑多婆呵那

法垂欲滅餘四十年是人爾時當於中出講宣大乘  
方等經典拯拔興起垂滅之法廣令是經流布於世  
教人具足執持讀誦書寫解說聽受其義爾時若有  
不能如是受持解說是經典者當知是人非我弟子  
魔之眷屬爾時樂見乾闥婆王白佛言世尊唯願矜  
哀解說未來持法弟子如迦葉者成就大慈具足淨  
戒種姓眷屬無可譏呵佛言善男子諦聽諦聽當爲  
汝說我此弟子守護正法持佛種性一切衆生所樂  
見者善男子是南天竺有小國土名須賴吒其土有  
河名善方便其河有村名曰華鬘華鬘村中有婆羅

門產一童子卽是今之一切衆生樂見梨車後時復  
名衆生樂見是大菩薩大香象王常爲一切恭敬供  
養尊重讚歎其年二十出家修道多有徒衆修持淨  
戒稱詠諸佛大乘經典爲護正法不惜身命其諸弟  
子亦復如是若有比丘比丘尼優婆塞優婆夷聞是  
比丘所說正法必定當得阿耨多羅三藐三菩提爾  
時國王大臣長者及一切人爲此經故供養恭敬是  
持法者是經力故令彼國王得大勢力所有國土無  
能侵陵我此弟子魔不得便爾時若有受持讀誦書  
寫是經則得名爲大菩薩也名爲福田在淨僧數乾

闍婆王當於爾時我諸弟子多有信受如是經典得  
解脫者亦復不少善男子若有人能成就四事則能  
受持如是經典一者得聞深進大海水潮三昧二者  
得聞南方佛名三者親近於善知識四者至心信佛  
法僧爾時若有不能信受是經典者是魔眷屬若有  
信者是佛弟子善男子未來之世有信心者名爲親  
近諸佛世尊何以故如是經典諸佛封印所謂印者  
一切衆生悉有佛性如來常住無有變易善男子若  
有人能信是經者當知是人真佛弟子有能恭敬是  
持法者是人當爲未來諸佛徒衆眷屬何以故無量  
諸佛已於是人生希有心故所以者何是持法比丘  
不可思議已於過去同性燈佛發大誓願未來之世  
釋迦如來法垂欲滅我當於中出家修道爲護正法  
不惜身命時王精進龍王者卽今樂見梨車是樂見  
梨車卽是未來護法比丘善男子汝善觀察我此弟  
子未來功德若有人能恭敬供養我此弟子當知是  
人卽爲十方三世諸佛之所恭敬若未來世比丘比  
丘尼優婆塞優婆夷信受如是持法比丘所可演說  
卽是信受十方諸佛所有言說若有比丘比丘尼優  
婆塞優婆夷愛敬如是持法比丘不惜身命卽爲十

方三世諸佛之所愛念增長壽命若未來世比丘比丘尼優婆塞優婆夷恭敬供養是持法者專心繫念聽其所說不求其短當爲十方三世諸佛之所推覓護念守持如羅睺羅護念禁戒善男子未來之世薄福衆生比丘比丘尼優婆塞優婆夷當作是言咄哉咄哉如是衆生樂見比丘實非比丘作比丘像遠離諸佛所說經典自說所造名大雲經遠離諸佛所制禁戒自爲衆生更制禁戒諸大德各各諦聽若言貯畜金銀珍寶名爲破戒不貯畜者名爲持戒如來何處當作此說此非佛語說爲佛語我當云何不惜身命恭敬供養如是惡人宣說惡語以爲佛語唱說惡戒以爲佛戒諸大德我實不能信受如是惡比丘言若有供養如是人者唐捐其功終無果報爾時諸人聞是語已所有信心各各壞滅若有信受是惡語者當知是人從暗入暗若不信受是人則得從明入明善男子若有隨順是惡語者是魔眷屬若不隨順真我弟子善男子是大雲經其義幽隱難可解了若未來世有四部衆福德純厚得菩提心勤修行者作如是言善哉比丘眞佛弟子善住大地是大菩薩勇猛大士非下人也下劣之人不能如是迴轉大海諸大

德汝等可來當共供養如是比丘諸大德我今見是持法比丘卽是過世無量功德之果報也隨是比丘所住之處當知其地及其衆生功德成滿安樂無患若得覩見是比丘者當知是人已得天眼法眼具足我爲是不惜身命若聞其言寧捨身命終不忘失我今寧爲如是一人不惜身命終不能爲非法徒黨百千萬人捨於身命善男子如是惡法興出之時我此弟子當於是中護持我法善男子未來之世法欲滅時若有比丘比丘尼優婆塞優婆夷爲護法故不惜身命是則名爲熾然慧燈度脫衆生修行一切諸

佛所行得法翅羽翼破魔境界身得自在心得自在不可思議爲諸衆生之所愛敬善男子法欲滅時是持法者一日一夜六時唱令告諸衆生汝等當共受持正法諸惡比丘聞是語已心不甘樂不甘樂故便作是言大德如是邪法誰當信受默然者善若不默然當奪汝命是持法者復作是言我寧捨命終不默然諸惡比丘尋共害是持法比丘善男子如是之人是我最後持法弟子當知爾時我法則滅若言爾時我弟子中更有如是護持法者無有是處乾闥婆王言是持法者捨是身已更得何身佛言善男子捨是

身已當得佛身無邊之身乾闥婆王言唯願世尊爲  
諸衆生說是比丘云何捨身而得佛身佛言善男子  
善哉善哉聽我說此持法弟子功德之事過此賢劫  
千佛滅後具滿六萬二千劫中空過無佛爾時當有  
無量億那由他諸辟支佛在世教化過是劫已有七  
佛出是七如來般涅槃已此國爾時轉名喜光是喜  
光國當有佛出號智聚光如來應供正徧知明行足  
善逝世間解無上士調御丈夫天人師佛世尊是佛  
世界所有人民顏貌端正信心成就若有人能於我  
法中沒命教令護持悉當生於彼佛世界而爲彼佛

作大弟子大弟子者卽是菩薩摩訶薩也眞大丈夫  
大香象王彼國人民一切無有貪欲恚癡皆悉成就  
清淨信心智聚光佛壽十五中劫爲諸弟子開三乘  
教雖開三乘多說菩薩一乘之行爾時雖有魔王魔  
子悉發阿耨多羅三藐三菩提心一切衆生悉得大  
慈大悲之心皆得遠離三惡道苦無有八難世界常  
淨猶如北方鬱單越上天魔波旬不得其便永斷邪  
見彼佛如來入涅槃已法住千億然後滅盡說是語  
時一切大衆諸天龍神乾闥婆阿脩羅迦樓羅緊那  
羅摩睺羅伽持諸華香微妙妓樂供養於佛大迦葉

等諸大弟子歡喜讚歎恭敬作禮諸大菩薩復持妙  
華大如須彌供養於佛悉共發願願我未來生彼佛

世

大方等大雲經卷第三

音釋

旅郎果切蔓實曰旅 斫居觀切固也 糲苦外切糲也 蛭職日切馬驥也 鵒赤脂

切怪鳥也

吳江居士周祇施刻此卷祈先祖妣施氏離苦得樂修證菩提姑蘇沙門圓繼對長洲徐普書深水端學堯刻萬曆己亥夏閏月經山寂暎庵識

大方等大雲經卷第四

北涼天竺三藏法師曇無讖譯

大雲初分增長捷度第三十七之二

爾時大雲密藏菩薩白佛言世尊唯願如來為未來  
世薄福德衆生演說如是深進大海水潮三昧佛言  
善男子汝今不應作如是言何以故佛出世難此大  
雲經聞者亦難若有書寫受持讀誦一句一字亦復  
難得云何偏為未來之人吾當普為三世衆生廣開  
分別善男子我以未來薄福衆生罪根深重是故唱  
言此經當於未來流布善男子未來之世若能於此

大雲經中信心不疑讀誦一偈如是之人甚爲難得  
世尊如來何故作如是言善男子我亦不獨爲未來  
說何故而生如是疑心若有能聽如來所說一偈一  
句不生疑心於三世中亦復難得何以故三世衆生  
難得三昧陀羅尼門知恩報恩未來衆生不知恩分  
不能報恩不知恩故信心難得信難得故是故我言  
爲未來世說此經典若能讀誦受持是經一偈一句  
是人難得未來衆生薄福罪重是故復言爲未來世  
說此經典大雲密藏菩薩言世尊若有菩薩安住如  
是深進大海水潮三昧成就無量無邊功德非是聲  
聞緣覺所知佛言善哉善哉善男子住是三昧諸菩  
薩等深不可測譬如大海衆流所歸不可量數善男  
子如是大海猶可量數而諸菩薩不可量數何以故  
安住如是深三昧故復次善男子若有菩薩住是三  
昧能以足指一毛舉此恒河沙等三千大千諸大世  
界高至上方無量世界令諸衆生無有怖畏往返之  
想而令他方一切悉見爲化度故乃至十方亦復如  
是世尊如是三昧乃爲無量無邊功德之所成就是  
故佛說普爲三世善男子善哉善哉實如所言善男  
子譬如大海總攝一切諸河泉流此大雲經亦復如

是總攝一切無量經典復次善男子若諸經典有如  
是等無著三昧當知彼經已爲攝在此經典中一切  
聲聞辟支佛等所得三昧比此三昧不可爲喻何以  
故聲聞緣覺無常無我無樂無淨無著三昧廣闢如  
來常樂我淨無有變易是故此二不得相喻善男子  
若聞如來常不變易信心清淨當知是人得阿耨多  
羅三藐三菩提心修菩提道善男子若男若女欲得  
常住無有變易應當受持讀誦書寫演說是經若能  
如是受持演說是經典者當知是人不久當得阿耨  
多羅三藐三菩提若有人聞如來常住無有變易心

生疑怖當知是人不見如來真實之相真實相者所  
謂如來常恒不變湛然安住是故聞者不應疑怖應  
當受持廣爲人說如是說者當知佛法常住無滅善  
男子如一切衆跡入象跡中一切三昧亦復如是入  
此經中善男子如閻浮提一切山河叢林樹木及四  
天下山河樹木日月星宿悉皆入於三千大千世界  
之中一切凡夫聲聞緣覺諸佛菩薩所有功德禪定  
三昧亦復如是皆悉入此大雲經中若有衆生能於  
一念念諸如來常住不變當知卽得阿耨多羅三藐  
三菩提善男子譬如秋月無諸雲霧虛空清淨日初

出時光明端嚴人所愛樂除破一切幽暗黑冥是大雲經亦復如是演出如來常恒不變猛盛之日處在清淨密語虛空破除衆生無常無我無樂無淨一切暗障端嚴愛樂者喻於如來終不畢竟入於涅槃復次善男子譬如有人身輕行疾喻四風王壽命滿足無數千年飛行周遊十方世界徧已還到本所住處如是行處滿中七寶并以己身供養三寶復滿無數千年之中善男子如是福德可數量不不也世尊善男子如是福德不比有人一念之中念如來常法僧不滅善男子若復有人爲利養故爲恐怖故爲親近故演說如來常恒不變一字一句所得福德比前功德百分不及一分千分百千萬分乃至算數譬喻所不能及善男子譬如藥樹若有衆生取枝取莖取葉取華取果取皮是樹亦不生念取枝莫取莖取葉莫取葉取華莫取華取華莫取果取果莫取皮亦令一切衆病除愈隨上中下衆生所用若以合水若以合酥若末若丸若塗若服悉能愈病是大雲經亦復如是觀衆生若舉一偈若半偈一名一義一句半句信受二字言如來常亦不觀察衆生有修深進大海水潮三昧大慈大悲及不修行悉能令斷三惡道病

如來亦不觀察衆生取一偈不取半偈取半偈不取名取名不取義取義不取向取向不取半句取半句乃至二字皆悉能令四部之衆離三惡道善男子未來之人不修身不修戒不修心不修慧輕笑賤慢爲求過失及以利養少多讀誦書寫聽受亦得遠離無量惡業永斷貪欲恚癡等病善男子如日出時能銷冰雪是大雲經亦復如是說如來常能銷一切無常冰雪復次善男子譬如虛空猛風起時吹衆生身入諸毛孔能令熱病一切除愈身得清涼虛空者喻大雲經猛風起者喻如來常風入毛孔者喻諸衆生悉有佛性除熱病者喻斷聲聞辟支佛心復次善男子若有人能讀誦受持如是經典終不爲於須陀洹果護持禁戒終不爲向斯陀含得斯陀含向阿那含得阿那合向阿羅漢得阿羅漢護持禁戒若爲向佛取無上果是則名爲真持禁戒非爲三十二相八十種好護持禁戒若爲如來不可思議乃名護戒如來非爲住心修習無量三昧亦復不爲住心修習與諸佛等亦復不爲住心修習無量因果不爲住心修習諸佛無量功德如來住於無所住者是爲實相若期如來無上印者不名護戒若言如來爲是印故名護戒

者汝於此中慎勿生疑如來無相故名爲護戒若言如來爲於相故名護戒者亦勿生疑如來無種好故名爲護戒若言如來爲種好故名持戒者亦勿生疑如來非神通因緣故名爲護戒如來非密藏故名爲護戒如來非無上福田故名爲護戒如來非爲如來逼切名爲護戒爲欲安樂諸眾生故名爲護戒爲斷衆生生死縛故名爲護戒爲令衆生專向無上菩提道故名爲護戒爲諸衆生得阿耨多羅三藐三菩提故名爲護戒欲令衆生轉法輪故名爲護戒爲令衆

生一切皆得聖僧名故名爲護戒爲令衆生不斷如來聖種性故名爲護戒爲令衆生一切不斷法僧種故名爲護戒爲令衆生一切悉得三昧禪定智慧解脫故名爲護戒爲令衆生悉得淨戒具足無缺故名爲護戒如來無戒故名護戒斷一切戒故名護戒如來非有此戒故名護戒非無此戒故名護戒爾時大雲密藏菩薩摩訶薩白佛言世尊若言如來不護戒者其義云何若復有言菩薩住是深進大海水潮三昧不護戒者其義云何如來非爲無上印故名護戒者義復云何佛言善男子菩薩摩訶薩自從住是三

昧已來初不曾住有爲法中具足成就一切佛法何以故如是三昧悉已攝取一切佛法故善男子如大寶聚有青瑠璃其色清淨人見之者不生疑心菩薩摩訶薩從得住是三昧已來卽見佛性了了無疑何以故見了了故若有疑者無有是處如來境界不可思議善男子菩薩住是三昧已成就具足諸佛功德世尊菩薩摩訶薩住是三昧得畢竟不善男子汝不應言如是菩薩得畢竟不何以故若一切衆生得是三昧悉成阿耨多羅三藐三菩提盡畢竟已然後乃當問是菩薩得畢竟不世尊如是三昧甚爲希有若

諸衆生不得聞受甚可憐愍若得聞者當知是人得大饒益佛言善哉善哉若有聞是三昧名者當知是人入中之上譬如族姓端正王子威猛勇健心無慳悋持戒清淨無可譏訶人所樂見眷屬敬念統領國土人民歸順菩薩摩訶薩住是三昧亦復如是皆悉成就諸佛功德善男子如旃陀羅終不作王若作王者無有是處何以故諸上族等所嗤笑故若有衆生不能受持讀誦書寫如是三昧欲得成就諸佛所有微妙功德亦無是處何以故當爲一切諸菩薩等所嗤笑故善男子汝今觀是安住三昧諸菩薩等能知

如來常恒不變若有不能住是三昧則不能知如來  
常恒無有變易菩薩摩訶薩爲衆生故受持讀誦如  
是三昧則得具足檀波羅蜜何以故如是菩薩見有  
求索頭目髓腦肢節手足國城妻子奴婢僕從象馬  
七珍則能隨彼種種給施尚以身施況復外寶施時  
歡喜施已無悔於阿耨多羅三藐三菩提若得不得  
心無疑慮終不爲報而行布施若言爲報行布施者  
無有是處不爲貪故而行布施爲憐愍故而行惠施  
爲如來常故爲護法故爲欲具足檀波羅蜜演說如  
來常恒不變故行惠施復次善男子菩薩摩訶薩住

是三昧已則能少知一切衆生悉有佛性如來常恒  
無有變易住是三昧菩薩摩訶薩常作是觀我今此  
身空無所有已得無上大利益事我今以此肢節手  
足頭目髓腦肌皮血肉布施於人未來當得阿耨多  
羅三藐三菩提世尊菩薩摩訶薩住是三昧云何而  
作如是觀身善男子是菩薩摩訶薩不見是身去來  
坐臥猶如空瓶是故菩薩觀身空寂血肉骨髓各爲  
空身住是三昧諸菩薩等得非血肉骨髓之身成就  
法身不名食身世尊如來法身不名食身其義云何  
法身無像不可覩見云何而得教化衆生如來常於

諸經中說如鳥飛空無有足跡如來法身亦復如是  
無有去來無轉無說不可破壞佛言善男子勿作是  
語如來常所化衆生身是名化身世尊其義云何世  
尊如佛所說住是三昧則得法身云何復言是變化  
身如來法身若爲教化作裸食身云何此身非虛妄  
耶眞法身者云何復作裸食之身若作裸食身是義  
不然佛言止止勿作是語住是三昧菩薩摩訶薩若  
有化身是名幻身世尊何故顛倒以此非身而名爲  
身其無物者名之爲幻若是幻身云何而得不誑衆  
生佛言善男子莫作是觀住是三昧菩薩摩訶薩無

有住身雖無住身如藥樹王如草木瓦礫我身亦爾  
何以故我身無我無有所無命無語無心無實無  
陰界入猶如藥樹能除衆生一切病苦我身亦爾除  
滅衆生無量痛苦何以故身如幻故復次善男子譬  
如藥樹終不生念取葉莫取枝菩薩摩訶薩亦復如  
是終不生念取手莫取足何以故是三昧力故亦能  
除斷一切衆生貪欲瞋恚愚癡等病住是三昧菩薩  
摩訶薩無內身無外身無內外身無死生身得甘露  
身甘露身故能斷衆生貪欲瞋恚愚癡等病復次善  
男子住是三昧菩薩摩訶薩作變化身爲斷一切諸

惡鳥獸及三惡道猶如藥樹若有人言諸惡鳥獸遇  
菩薩身到三惡道無有是處若言捨身轉至人天見  
諸佛者斯有是處復次善男子若言四衆住是三昧  
則得親近無量諸佛亦有是處復次善男子比丘比  
丘尼優婆塞優婆夷若欲修習是三昧者先當思惟  
如來常恒無有變易佛法不滅無有畢竟入涅槃者  
復作是念一切衆生種種所須我當給施若腳若手  
若頭若目爲正法故悉捨所有捨時歡樂捨已無悔  
何以故我此身者猶如藥樹若能作是一念思惟當  
知不久得是三昧復次善男子譬如駿馬驥尾纖長

於十五日布薩之時在大海中悲鳴三唱誰欲度海  
誰欲度海若有諸人乘其背者及捉驥尾頸項背腳  
悉得到於大海彼岸是大雲經亦復如是若有人能  
受持讀誦解說書寫乃至一句一字二字一切皆度  
三惡彼岸永得解脫復次善男子比丘比丘尼優婆  
塞優婆夷若有得聞是三昧名生生常得轉輪聖王  
帝釋梵王終無退轉常得親近佛法聖衆於菩提心  
堅固不動不捨大乘方等經典世尊云何菩薩摩訶  
薩住是三昧於一切法所見真正佛言善男子若有  
成就是三昧者見於如來無常無樂無我無淨畢竟

涅槃則不得名所見真正若見如來常樂我淨終不  
畢竟入於涅槃如是乃名所見真正世尊如佛所說  
若見如是常樂我淨其義云何善男子常樂我淨卽  
是如來真實之性世尊若如是者一切凡夫亦得成  
就如是實性何以故凡夫之人亦復計於常樂我淨  
善男子汝今不應作是說我言具是三昧菩薩乃能  
見於常樂我淨不說凡夫所計顛倒常樂我淨世尊  
如佛所說若見諸法無常無樂無我無淨是人則見  
上道下道得須陀洹果乃至得阿耨多羅三藐三菩  
提若見諸法常樂我淨則不能得須陀洹果乃至阿

耨多羅三藐三菩提云何世尊言菩薩成就是三昧  
已則得見於常樂我淨又如佛言真解脫者猶如虛  
空如是解脫卽是涅槃云何如來說言涅槃常樂我  
淨一切衆生亦如虛空水月夢幻芭蕉雲電空無性  
相不得暫住猶如畫水隨畫隨合無覺無知無常無  
樂無我無淨見如是相則名真見真見者得須陀洹  
果乃至阿耨多羅三藐三菩提云何如來說言菩薩  
成就是三昧乃得見於常樂我淨如佛先說諸佛如  
來觀一切法無常無樂無我無淨無有壽命士夫衆  
生空無所有是名諸法真實之性今者復言見一切

法常樂我淨是義云何善男子止止莫作是言善男子若有菩薩成就具足是三昧已則不復與諸法和合不和合故得名護戒修習三昧菩薩摩訶薩不見諸法斷常之相不見斷故不生喜悅不見常故不生憂感爲知法印不爲護戒亦不得名修習三昧如來不著護戒毀戒常無常覺不覺作不作淨不淨空不空戒非戒知非知名非名取非取怖非怖畏非畏因非因滅非滅菩提非菩提解脫非解脫涅槃非涅槃一切諸法無有怖畏爲解脫故護持禁戒修習三昧一切諸法無有退滅菩薩知己其心甘樂修是三昧

爲諸衆生說佛如來常恒不變正法不滅是故護戒修習三昧復次善男子若有欲得如是三昧應當修習常想我想命想人想習此想已則得成就具是三昧若言不得無有是處世尊如來或說無常無樂無我無淨或時復說常樂我淨其義云何善男子世俗之道謬見諸法常樂我淨是故我說無常無樂無我無淨世尊出世之法頗復得有常樂我淨不善男子若有菩薩住是三昧欲說我時先說五事何等爲五一者穀子二者樹子三者肥味四者伏藏五者蛇蛻皮善男子如穀子者芽時莖時葉時華時名爲無常

若收果實衆生受用則名爲常菩薩摩訶薩若未成  
就是三昧者無常無樂無我無淨若已成就則得名  
爲常樂我淨未能度脫一切衆生名無常無樂無我  
無淨若能度脫則得名爲常樂我淨不能破壞一切  
邪見名無常無樂無我無淨若能破壞則得名爲常  
樂我淨不能永斷諸煩惱故名無常無樂無我無淨  
若能永斷是則名爲常樂我淨善男子是名穀子復  
次善男子如菴羅樹未得果時名無常無樂無我無  
淨若得果實衆生受用是則名爲常樂我淨菩薩摩  
訶薩未得成就是三昧者無常無樂無我無淨若成  
就已則得名爲常樂我淨未能度脫諸衆生故名無  
常無樂無我無淨若能度脫則得名爲常樂我淨不  
能破壞一切邪見名無常無樂無我無淨若能破壞  
則得名爲常樂我淨不能永斷諸煩惱或名無常無  
樂無我無淨若能永斷則得名爲常樂我淨善男子  
是名樹子復次善男子如胡麻子未成油時不能銷  
除衆生病苦名無常無樂無我無淨若成油已能除  
衆生所有病苦是故得名常樂我淨菩薩摩訶薩未  
得成就是三昧者無常無樂無我無淨若成就已則  
得名爲常樂我淨未能度脫諸衆生故名無常無樂

無我無淨若能度脫則得名爲常樂我淨不能破壞  
一切邪見名無常無樂無我無淨若能破壞是則名  
爲常樂我淨不能永斷諸煩惱故名無常無樂無我  
無淨若能永斷是則名爲常樂我淨善男子是名肥  
味復次善男子如有寶藏隱伏地中不能潤益一切  
衆生故名無常無樂無我無淨若出地已衆生受用  
爲大利益是則名爲常樂我淨菩薩摩訶薩若未成  
就是三昧者名無常無樂無我無淨若成就已則得  
名爲常樂我淨未能度脫諸衆生故名無常無樂無  
我無淨若能度脫則得名爲常樂我淨若不能壞一

切邪見名無常無樂無我無淨若能破壞是則名爲  
常樂我淨不能永斷諸煩惱故名無常無樂無我無  
淨若能永斷則得名爲常樂我淨善男子是名寶藏  
復次善男子如蛇蛻皮未蛻皮時名無常無樂無我  
無淨若蛻皮已則得名爲常樂我淨菩薩摩訶薩未  
得成就是三昧者名無常無樂無我無淨若成就已  
則得名爲常樂我淨未能度脫一切衆生名無常無  
樂無我無淨若能度脫則得名爲常樂我淨若不能  
壞一切邪見名無常無樂無我無淨若能破壞則得  
名爲常樂我淨不能永斷諸煩惱故名無常無樂無

我無淨若能永斷則得名爲常樂我淨又斷衆生於諸佛所起四種疑心常樂我淨善男子是名蛇蛻皮善男子菩薩摩訶薩住是三昧以此五事演說如來常樂我淨能說我人壽命衆生士夫能如是見名爲正見世尊如來所說如是五事是義不然何以故如來常於諸經中說諸法無常如向五事因亦無常果亦無常若使菩薩住是三昧如五事者亦應無常以是義故一切諸法無非無常世尊有因必有果有果必有因一切衆生及諸菩薩亦復如是有生必有死有死必有生若如是者常亦無常無常亦常以是義

故一切諸法悉有二性常與無常不應定言世法無常出世法常如來實語云何出是虛妄之言善男子汝今何故如蠶自裹善男子若有人言端正之人猶如滿月香象妹白猶如雪山人實非月象非雪山少有相似故引爲喻善男子世間五事亦復如是有少常故故以爲喻諸佛如來實不可喻猶引喻爲喻世尊若如來常者何故復於餘經中說猶如燈滅解脫亦爾世尊如來若常云何得滅如其滅者云何言常如來若言亦常亦滅如是之言非虛妄耶又如佛言一切諸法猶如水月諸法若常云何復言猶如水月

善男子我說有爲如水中月是故我說餘法有常餘法無常若有衆生未得解脫未斷煩惱未斷名相未斷衆生相不得法相未得修習如是三昧是名無常若有衆生已得解脫永斷煩惱名相衆生相得於法相修習三昧是名爲常是故我說餘法有常餘法無常世尊若爾者如來何故說佛涅槃猶如燈滅如燈滅者爲喻身滅爲喻結滅如炷不離燈燈不離炷衆生亦爾身不離結結不離身云何言滅佛言善哉善哉善男子若如是見名爲正見善男子身有二種一者煩惱身二者法身煩惱身滅猶如煩惱滅是故我

說餘法無常法身無滅猶如虛空是故我說餘法是常斷煩惱器名爲解脫得解脫已無常身者諸佛世尊則是斷見若煩惱器常不滅者諸佛世尊則是常見諸佛世尊定無有此斷常二見諸佛世尊已於無量阿僧祇劫斷此二見如來若有衆生相者則應無常如來已於無量劫中斷衆生相若言如來有衆生相無有是處善男子譬如大王出入遊巡若在外時內則不見內雖不見不得言無外亦如是菩薩摩訶薩住是三昧無常已斷爲衆生故受無常身若言如來身無常者無有是處是故我說常與無常說我無

我說衆生非衆生說人非人說命非命說士夫非士夫如來常說有爲之法皆是無常終不言常若言常者無有是處復次善男子菩薩摩訶薩住是三昧則得斷除世見命見聲聞緣覺見無有貪愛無取無求常不變易成就安住得無所畏無有憍慢垢不能汗是故我說常樂我淨善男子我說聲聞辟支佛乘一切世人之所不解雖世人不解終不得言慧者亦爾世間之人雖見如來無常無樂無我無淨亦不得言有智慧者同於彼見薄福鈍根行邪道者作如是言如來無常永滅涅槃若言如來永滅度者當知是人

不離三塗善男子譬如湛汪其水渾濁中有寶珠人所不見有人唱言此濁水中有大寶珠衆人聞已競共求覓或得瓦石沙礫草木然無有能得真寶者以不得故便言虛妄復更有人善知方便以無價珠置之濁水水卽爲清衆人因是悉見真寶善男子聲聞緣覺不解如是三昧力故說言如來無常無樂無我無淨空無所有不知如來常恒不變輪轉生死菩薩摩訶薩住是三昧善解如來所有密語是故以此無價寶珠喻於三昧善男子若男若女欲見如來常恒不變應當修習如是三昧菩薩摩訶薩住是三昧則

見如來常恒不變解脫亦爾善男子譬如樹蔭行路  
之人因之憩息住是三昧諸菩薩等亦復如是爲諸  
衆生而作蔭覆善男子若有人言如來無常永涅槃  
者是魔弟子若不如是真我弟子若言如來畢竟入  
涅槃當知是人汗辱我法若有信受如是語者甚可  
悲傷說是語時於會四面出大光明其光金色徧照  
三千大千世界悉蔽日月梵天之明唯不能障佛之  
光明其餘光明黤黤不現大小須彌草木叢林二國  
中間幽暗之處無不大明地獄衆生遇斯光已苦痛  
休息身得安樂爾時一切大衆之前卽時出生六萬

億華其華微妙色香具足千葉成滿四寶爲質一  
蓮華出微妙香徧滿三千大千世界其中所有天龍  
鬼神乾闥婆阿脩羅迦樓羅緊那羅摩睺羅伽釋梵  
魔天沙門婆羅門一切衆生聞香氣已皆得愛法心  
樂大乘樂欲聽法斷諸煩惱是華茂盛成就如是功  
德微妙之香爾時大雲密藏菩薩摩訶薩在大會中  
見是神變卽從座起合掌恭敬白佛言世尊是何相  
貌誰之德力是大衆中有是妙華出無量香於是淨  
光天女語大雲密藏菩薩言善男子一切諸法皆悉  
無相云何問言是何相貌諸法如夢何故顛倒如狂

所問大雲密藏言善哉善哉天女我非不見諸法如  
夢爲欲斷彼著相故問天女言大德何故見於著相  
而生此問天女是故我先言爲衆生欲令度脫是故  
而問大德若不自斷我見我疑云何而能度脫衆生  
若不自斷我見我疑欲爲衆生除斷見疑無有是處  
佛言善哉善哉善男子實如天女之所宣說菩薩摩  
訶薩住是三昧唯見無相善男子若男若女欲見無  
相應當精勤修是三昧菩薩摩訶薩住是三昧能於  
三千大千世界現種種身世尊云何菩薩住是三昧  
能於三千大千世界現種種身善男子若有幻師若

幻弟子於大衆中能作種種若男若女若大若小若  
生若死若去若來若舍若林若象若馬若斷若折若  
破若壞若續若絕大衆見已不生驚怪何以故了知  
幻故菩薩摩訶薩亦復如是住是三昧修習正道於  
此三千大千世界化種種身爲度衆生故住是三昧  
諸菩薩等見是化已不生驚怪無有疑心隨順於義  
無有違逆何以故定知卽是三昧力故復次善男子  
菩薩摩訶薩住是三昧能於三千大千世界隨諸衆  
生種種所行處處現身或閻浮提現處母胎一切衆  
生實見菩薩處在母胎而是菩薩實不在胎或閻浮

提現出母胎衆生亦見菩薩出胎而是菩薩實不出胎或閻浮提現初剃髮造制周羅一切生皆見如是而於菩薩實無是相或閻浮提現詣學堂習諸技藝書疏算計一切衆生皆見菩薩始初習學而是菩薩已於過去無量劫中悉修學已或閻浮提現行人師子白鷺一切衆生皆見菩薩現行人師子白鷺而是菩薩都無此相或閻浮提示有妻子五欲相樂一切衆生皆見是相而是菩薩已於昔劫久遠離之唯以法樂而自娛樂或閻浮提示大小便一切衆生亦見是相而此菩薩得眞法身非雜食身云何而有大小便利咀嚼楊枝著衣洗手履踐革屣執持傘蓋身服瓔珞飲食飢渴生老病死行檀波羅蜜得轉輪王奴婢僕從男女大小或作人天頭陀苦行現爲比丘福利衆生現須陀洹果斯陀含果阿那含果阿羅漢果破壞衆僧聽法說法食噉毒飯犯四重禁作五逆罪作聲聞像辟支佛像出家學道菩提樹下轉正法輪現大神足入於涅槃或作釋梵天魔波旬流轉諸有猶如車輪亦復如是善男子菩薩摩訶薩難作如是隨順世間種種諸行爲欲度脫終不生於衆生之相常修法相何以故是三昧力故菩薩摩訶薩

無有著處不著聲聞不著緣覺爲欲憐愍一切世間  
度衆生故在在處處隨其所樂而現其身是故菩薩  
修習無相見於無相若人能見如是無相是名正見  
淨光天女亦修無相諸佛世尊住是三昧故不可思  
議世尊是淨光天女成就具足甚深智慧若無相境  
界不可思議其修習者亦不可思議爾時世尊熙怡  
微笑從其面門出無量光其光五色徧照無量無邊  
世界上至梵世一切周徧繞身三匝還從口入爾時  
大地六種震動莊嚴清淨如鬱單越三千大千世界  
亦復如是一切衆生佛神力故悉得覩見爾時大雲

密藏菩薩復從座起整衣服合掌恭敬白佛言世尊  
何因緣故放是光明佛言善男子汝向所疑我今欲  
答是故放是瑞相光明善男子於此西方有一世界  
名曰安樂其土有佛號無量壽今現在世常爲衆生  
講宣正法告一菩薩汝善男子娑婆世界釋迦牟尼  
佛爲諸少福鈍根衆生說大雲經汝可往彼至心聽  
受是彼菩薩欲來至此故先現瑞善男子汝觀彼土  
諸菩薩身滿足五萬六千由旬世尊彼來菩薩字號  
何等復以何緣而來此土將非爲度衆生故來唯願  
如來爲諸衆生分別解說善男子彼土菩薩欲聞淨

光受記新事并欲供養如是三昧是故而來善男子  
是菩薩名無邊光通達方便善能教導世尊唯願如  
來說是天女在何佛所發阿耨多羅三藐三菩提心  
何時當得轉此女身善男子汝今不應問轉女身是  
天女者常於無量阿僧祇劫爲衆生故現受女身當  
知乃是方便之身非實女身云何當言何時當得轉  
此女身善男子菩薩摩訶薩住是三昧其身自在能  
作種種隨宜方便雖受女像心無貪著欲結不汙世  
尊唯願如來爲諸衆生說是天女未來之事善男子  
汝今諦聽我當說之以方便故我涅槃已七百年後

是南天竺有一小國名曰無明彼國有河名曰黑暗  
南岸有城名曰熟穀其城有王名曰等乘其王夫人  
產育一女名曰增長其形端嚴人所愛敬護持禁戒  
精進不倦其王國土以生此女穀米豐熟快樂無極  
人民熾盛無有衰耗病苦憂惱恐怖禍難成就具足  
一切吉事隣比諸王咸來歸屬有爲之法無常遷代  
其王未免忽然崩亡爾時諸臣卽奉此女以繼王嗣  
女旣承正威伏天下閭浮提中所有國土悉來承奉  
無拒違者女王自在摧伏邪見爲欲供養佛舍利故  
徧閭浮提起七寶塔齋持雜絲上妙幡蓋栴檀妙香

周徧供養見有護法持淨戒者供養恭敬見有破戒  
毀正法者呵責毀辱令滅無餘具足修習十波羅蜜  
受持五戒拯濟貧窮教導無量一切衆生說大雲經  
以調其心若聞大乘方等經者恭敬供養尊重讚歎  
滿二十年受持讀誦書寫解說是大雲經然後壽盡  
是時乃當轉此女身爲衆生故示大神通爲欲供養  
無量壽佛故故生彼界世尊是女王者未來當得阿  
耨多羅三藐三菩提不耶善男子如是女王未來之  
世過無量劫當得作佛號淨寶增長如來應正徧知  
明行足善逝世間解無上士調御丈夫天人師佛世

尊此娑婆世界爾時轉名淨潔浣濯有城名曰清淨  
妙香其城純以七寶莊嚴最勝無上猶勿利宮其城  
凡有九萬億人土地平正無有荆棘土沙礫石其土  
人民不生邪見愛重大乘無有聲聞緣覺之名一切  
純是菩薩大士修習慈悲喜捨之心成就忍辱壽命  
無量善男子若有衆生得聞彼佛如來名號不墮三  
惡轉生人天說是經已無量衆生得阿毗跋致

大方等大雲經卷第四

音釋

嗤

赤脂切  
笑也

駿

子紅切  
馬鬣也

姝

春朱切  
美好也

黠

黠烏感切  
丁感切

黠

烏感切  
丁感切

黠

烏感切  
丁感切

昏黑也

吳江居士周祇施刻此卷祈  
先祖妣姜氏離苦得樂修證菩提  
姑蘇沙門圓繼對長洲徐普書進賢傳汝禎刻  
萬曆己亥夏閏月徑山寂照庵識

如來莊嚴智慧光明入一切佛境界經卷上

元魏三藏法師曇摩流支譯

如是我聞一時婆伽婆住王舍城鷲頭山中第四重  
上法界藏殿與大比丘衆二萬五千人俱皆是阿羅  
漢諸漏已盡無復煩惱心得自在善得心解脫善得  
慧解脫心善調伏人中大龍應作者作所作已辦離  
諸重擔逮得已利盡諸有結善得正智心解脫一切  
心得自在到第一彼岸復有阿若拘隣等八大聲聞  
而爲上首復有菩薩摩訶薩七十二億那由他其名  
曰文殊師利法王子菩薩摩訶薩善財功德菩薩摩

訶薩佛勝德菩薩摩訶薩藥王菩薩摩訶薩藥上菩薩摩訶薩等皆住不退地轉大法輪善能諮問大方廣寶積法門位階十地究竟法雲智慧高大如須彌山善修習空無相無願心不生相一切皆得大甚深法智慧光明皆悉成就佛威儀行此諸菩薩摩訶薩衆皆是諸佛神力所加從於他方百千萬億那由他諸佛世界而來集會皆得成就諸神通業皆悉安住法性實際爾時世尊作如是念我今轉於無上法輪欲令諸菩薩摩訶薩速疾生於大智慧力又復欲令恒河沙等諸世界中有大威德大神通力菩薩來集

時佛世尊復作是念我爲說大方廣法門欲現瑞相放大光明何以故欲令一切諸來菩薩摩訶薩等皆悉諮問我所說法爾時世尊念已卽放大光明雲普照十方阿僧祇不可思議三千大千微塵數等世界卽時十方一一世界十不可數佛國土百千萬億那由他微塵數等菩薩摩訶薩俱來雲集一一菩薩各以菩薩神通力故所有一切不可思議最勝供養供養諸佛彼諸菩薩一一各以本願力故在如來前升蓮華座至心觀佛瞻仰而坐卽時法界藏殿上有大寶蓮華藏高座從地涌出縱廣億那由他阿僧祇

由旬其華形相上下相稱以一切光明摩尼寶爲體  
電光摩尼寶爲周帀欄楯不可思議光明摩尼寶爲  
竿不可思議摩尼寶以爲眷屬過諸譬喻光明摩尼  
寶以爲垂瓔自在王摩尼寶以爲羅網種種摩尼寶  
以爲間錯懸諸無量寶蓋幢幡彼大寶蓮華藏高座  
周帀俱放十阿僧祇百千萬億那由他光明是光爾  
時徧照十方無量世界卽時十方於一一方有十億  
不可說佛國土百千萬億那由他微塵數等天龍夜  
叉乾闥婆阿脩羅迦樓羅緊那羅摩睺羅伽四天天  
王釋提桓因梵天王等皆來集會彼諸天等各各皆

乘寶殿樓閣一一皆有不可思議阿僧祇天女作百  
千萬億那由他種種妓樂娛樂而來到於佛所復有  
諸天龍等各各皆乘華殿樓閣來詣佛所復有諸天  
龍等各各皆乘優羅伽娑羅栴檀香殿樓閣來詣佛  
所復有諸天龍等各各皆乘真珠寶殿樓閣來詣佛  
所復有諸天龍等各各皆乘種種絲殿樓閣來詣佛  
所復有諸天龍等各各皆乘金剛光明摩尼寶殿樓  
閣來詣佛所復有諸天龍等各各皆乘閻浮那提金  
寶殿樓閣來詣佛所復有諸天龍等各各皆乘集一  
切光明摩尼寶殿樓閣來詣佛所復有諸天龍等各

金剛

如來華嚴經卷第六十一 七十七 法身緣第一

男力

一經

石家寺藏書目録一切佛藏卷之三

男力

各皆乘自在王摩尼寶珠殿樓閣來詣佛所復有諸  
天龍等各各皆乘如意寶珠殿樓閣來詣佛所復有  
諸天龍等各各皆乘帝釋王頸下瓔珞摩尼寶珠殿  
樓閣來詣佛所復有諸天龍等各各皆乘持清淨大  
海普放千光明大摩尼寶珠殿樓閣來詣佛所如是  
等輩各各皆有不可思議阿僧祇天女作百千萬億  
那由他種種歡樂娛樂而來到於佛所到已俱作過  
一切世間不可思議不可稱不可量不可數種種放  
樂供養如來彼諸天等以本願力隨座所須自然具  
足卻坐一面至心觀佛瞻仰而住爾時三千大千世

界大地卽成閻浮提金種種摩尼寶樹莊嚴世界種  
種天華樹種種衣服樹種種優羅伽娑羅栴檀樹種  
種香樹莊嚴世界電光摩尼寶以爲羅網徧覆三千  
大千世界建大寶幢懸諸幡蓋彼諸樹中一一皆有  
百千萬億那由他阿僧祇天女皆現半身兩手俱持  
百千萬億諸寶瓔珞供養而住爾時彼大寶蓮華藏  
大師子座中出妙音聲而說偈言

我依佛力生 本願今成就 願人王來坐  
奉戴兩足尊 我此身唯寶 華淨衆所樂  
寶成由佛力 願尊滿我願 坐師子華藏

巖世界及我 說法多衆聞 還得師子座  
我身千光明 照無量世界 願尊坐我上  
生我歡喜心 於此說法處 已坐八億佛  
願尊今速坐 攝受利益我

爾時世尊從本座起卽升大寶蓮華藏大師子座結  
加趺坐觀察一切菩薩摩訶薩衆欲爲菩薩說勝妙  
法卽便現相卽時一切菩薩摩訶薩衆作是思惟文  
殊師利法王子應爲我等諮問如來應正徧知不生  
不滅法門以我等輩從久遠來已曾聞此勝妙法門  
爾時文殊師利法王子見如來相知諸菩薩摩訶薩  
衆心思惟已卽白佛言世尊何等法門名不生不滅  
卽說偈言

佛說無生滅 彼釋何等相 何法不生滅  
願說喻相應 菩薩爲智慧 承諸佛神力  
無量世界來 願說勝妙法

爾時佛告文殊師利法王子言善哉善哉文殊師利  
汝能問佛此甚深義文殊師利汝爲安隱無量衆生  
能與無量衆生種種快樂復能憐愍無量衆生廣能  
利益無量衆生與無量衆生人天之樂爲諸菩薩摩  
訶薩等究竟佛地文殊師利汝於此義莫驚怖畏文

殊師利我爲汝說不生不滅法當依智解文殊師利  
不生不滅法者卽是如來應正徧知文殊師利譬如  
大地大毗瑠璃所成形相猶如三十三天所住之處  
彼大地中見三十三天釋提桓因并善法堂影現分  
明及見天王釋提桓因天中所有五欲境界戲樂等  
事一切皆見爾時諸天唱告一切男子女人童男童  
女作如是言汝等可來觀此天王釋提桓因善法之  
堂及天王所有五欲境界戲樂之具復作是言諸善  
男子善女人等汝當布施持戒種諸善根皆當得此  
善法堂處及以天中五欲境界戲樂之具當作天王

并得果報及神通力如釋提桓因隨其所有五欲境  
界畢竟成就必得受用文殊師利爾時彼諸善男子  
善女人童男童女等於彼大毗瑠璃地中見三十三  
天釋提桓因善法之堂及五欲境界戲樂之具影現  
分明卽各散華合掌供養作如是言如彼釋提桓因  
身并善法堂及彼天中五欲境界我亦應得文殊師  
利而彼衆生皆悉不知三十三天善法之堂釋提桓  
因及五欲境界如是等事一切皆依大毗瑠璃地中而  
現何以故大毗瑠璃地清淨故一切影像悉現其中  
文殊師利而彼衆生爲求天王帝釋身故所有修行

布施持戒種諸善根皆悉迴向三十三天文殊師利  
而大毗瑠璃地中實無有彼三十三天善法之堂釋  
提桓因及以五欲境界等事以大毗瑠璃寶地清淨  
鏡像現故彼三十三天善法之堂釋提桓因五欲境  
界以不實故不生不滅以大毗瑠璃寶地清淨鏡像  
現故文殊師利如是如是一切衆生依清淨心如實  
修行見如來身文殊師利一切衆生依如來加力故  
見如來身而如來身不實不生不滅非有物非無物  
非可見非不可見非可觀非不可觀非有心非無心  
非可思議非不可思議非有非無文殊師利一切衆

生依於如來清淨法身鏡像力故得見如來清淨法  
身奉施寶衣散華燒香合掌供養而作是言我亦應  
得如來應正徧知清淨法身文殊師利而彼一切衆  
生爲求如來清淨法身布施持戒種諸善根以此善  
根求如來智迴向阿耨多羅三藐三菩提時文殊師  
利如彼大瑠璃地鏡像中三十三天帝釋王身不動  
不生心不戲論不分別不分別無分別不思無思不  
思議無念寂滅寂靜不生不滅不可見不可聞不可  
嗅不可味不可觸無諸相不可覺不可知如是文殊  
師利如來應正徧知清淨法身亦復如是不動不生

心不戲論不分別不分別無分別不思無思不思議  
無念寂滅寂靜不生不滅不可見不可聞不可嗅不  
可味不可觸無諸相不可覺不可知文殊師利如來  
法身不生不滅不去不來以此爲體如鏡中像世間  
所見隨諸衆生種種信力如來示現種種異身隨彼  
衆生感有長短如來現身命有脩促隨彼衆生於大  
菩提有能信力如來現身隨彼衆生聞法能信受如  
來現身隨彼衆生信心能知三乘之法如來現身隨  
彼衆生得解脫力如來現身文殊師利譬如虛空有  
大妙法鼓依三十三天功德力生離善法堂在虛空

中過一切諸天眼識境界不可見不可觀文殊師利  
彼大妙法鼓於何時出聲文殊師利以彼諸天耽著  
五欲境界常不捨離增長放逸不入善法堂聞法思  
義釋提桓因亦耽著五欲境界常不捨離增長放逸  
不入善法堂不升高座爲天說法爾時彼大妙法鼓  
不可見不可觀過眼境界住虛空中出妙法聲彼妙  
法聲徧聞三十三天而作是言諸天當知一切色聲  
香味觸法皆悉無常莫行放逸天報速退諸天當知  
一切行苦一切行空一切行無我是故諸天莫行放  
逸若退天報生餘苦處諸天當共議法樂法喜法味

經

法苑珠林卷之四十一 七佛指掌疏卷之一

第九

經

法苑珠林卷之四十一 七佛指掌疏卷之一

第九

法順法念法諸天若不欲捨天報五欲境界應正修  
行文殊師利彼法鼓聲不可見無色不分別無分別  
過眼境界不生不滅離音聲語言離心意意識文殊  
師利爾時三十三天聞妙鼓聲卽入善法堂議法樂  
法喜法味法順法念法如說修行於彼天退生餘勝  
處釋提桓因亦入善法堂升法高座爲諸天說法文  
殊師利若阿脩羅共彼諸天鬪戰之時三十三天力  
弱退散爾時法鼓於虛空中出如是聲阿脩羅聞甚  
大驚怖退入大海文殊師利彼大法鼓無形相無作  
者不可見不可觀無無實不可思議無心無相無色

無聲無體無二過眼境界文殊師利三十三天依本  
行業彼大妙鼓空中出聲今彼諸天遠離一切諸障  
憂惱無染寂靜文殊師利如彼空中大法鼓身不可  
見不可觀無無實不可思議無心無相無色無聲無  
物無二過眼境界依本行業法鼓出聲令三十三天  
遠離一切諸障憂惱無染寂靜文殊師利如三十三  
天心放逸時彼妙法鼓出大音聲令三十三天遠離  
一切諸障憂惱無染寂靜文殊師利如是如來應正  
徧知清淨法身一切世間所不能見無無實不可思  
議無心無相無色無體無二過眼境界文殊師利如

彼衆生依本業行隨心能信得聞法聲而彼法聲能令衆生遠離一切諸障憂惱無染寂靜文殊師利彼清淨法身無說無體而諸衆生依善根業力聞妙法聲謂如來說法謂世間有佛文殊師利一切衆生聞如來聲能得一切樂具已信者令得正解聞聲正解是如來身初發心菩薩及一切凡夫衆生聞如來說法觀察如來增長一切善根文殊師利如來應正徧知清淨法身不生不滅應如是知文殊師利譬如初夏依諸衆生本業力故大地所有種子穀草叢林藥木出生增長爲與衆生資生樂具上虛空中生如是

風如是風者能生大雲生大雲者能澍大雨澍大雨者克滿大地滿大地者能令一切諸種滋茂爾時一切閻浮提人皆大歡喜生大踊躍而作是言此是大雲此是大雨文殊師利於虛空中天不雨時閻浮提人作如是言無雲無雨文殊師利隨何時中普興大雲徧澍大雨時諸衆生成作是言希有大雲希有大雨普澍大雨克滿大地文殊師利而彼虛空無雲無雨文殊師利依因於風彼虛空中能生大雲能生大雨文殊師利依因於風彼虛空中無雲無雨何以故以依衆生本業力故文殊師利如彼水聚於虛空中

風因緣住依風而雨而世間人稱言雲雨何以故以  
依衆生本業力故於虛空中澍大雨聚克滿大地文  
殊師利彼虛空中無雲無雨文殊師利彼大雲雨自  
性不生不滅離心意意識離去來相文殊師利如是  
諸菩薩摩訶薩依過去善根修諸善行聞佛說法得  
無障礙道一切衆生一切聲聞辟支佛等種諸善根  
求涅槃道世間衆生便謂如來應正徧知出現於世  
如來說法皆是眞語如語不異語而諸天人稱言如  
來文殊師利以依衆生善根力故法身出聲而諸天  
人作如是言如來說法文殊師利實無如來何以故

如來法身無相離相無處離處不實不生不滅文殊  
師利而彼如來樂說辯才爲天人說法無有窮盡隨  
所應聞皆令開解文殊師利始發心菩薩及以一切  
毛道凡夫依於衆生本業力故應見如來入涅槃者  
如來即便入於涅槃不可得見而彼衆生起如是心  
便謂如來畢竟涅槃文殊師利如來應正徧知不生  
不死不起不滅文殊師利如來應正徧知無始世來  
證於常住大般涅槃文殊師利如彼大雲不實不生  
不滅虛妄故有而諸衆生念想假名雲雨如是文殊  
師利如來不實不生不滅本來不生而諸衆生隨其

心相聞如來應正徧知現有說法文殊師利譬如大自在梵天王於十百千萬三千大千諸世界中自在無礙下觀一切諸天宮殿乃至觀於四天王等爾時彼大自在梵天王於彼十百千萬三千大千諸世界中爲自在主觀於一切諸天宮殿文殊師利時宮殿中一切諸天各各捨於五欲境界一切妓樂捨諸欲念生大恭敬心合掌供養大梵天王瞻仰而住文殊師利而彼大自在梵天王於彼一切諸宮殿中暫時而現爾時諸天爲生梵世所有善根迴向梵天文殊師利彼大自在梵天王十百千萬三千大千諸世界

至不退梵天住持梵宮依自在願住持力故一切衆生善根力故應化梵天日日觀察一切天宮下至四天王天各各捨於五欲境界一切妓樂捨諸欲念生大恭敬心合掌供養大梵天王瞻仰而住而彼大自在梵天王於一切諸宮殿中暫時現身於本處不動彼時諸天爲生梵世所有善根迴向梵天文殊師利而於彼處無實梵天文殊師利彼梵天空彼梵天無不實無名字無音聲無住處無體不思議無相離心意意識不生不滅文殊師利彼大梵天依本願善根住持力故依彼諸天善根住持力故於彼一切諸宮

殿中暫時現身文殊師利而彼諸天不知梵天身空  
無不實無名字無音聲無住處無體不思議無相離  
心意意識不生不滅如是文殊師利如來應正徧知  
空無不實無名字無音聲無住處無體不思議無相  
離心意意識不生不滅亦復如是文殊師利如來應  
正徧知依彼菩薩本願行力住持初發心菩薩住一  
切聲聞辟支佛乘依一切毛道凡夫善根力故如來  
應現百千萬相好莊嚴之身如鏡中像本處不動文  
殊師利初發心菩薩一切聲聞辟支佛及毛道凡夫  
不知如來應正徧知空無不實不可觀無名字無音  
聲無住處無體不思議無相離心意意識不生不滅  
文殊師利而如來百千萬億種種相好莊嚴之身具  
足如來一切種種諸威儀行隨諸衆生種種信故出  
大妙聲爲衆生說法能令衆生遠離一切諸障憂惱  
無染寂靜而如來一切平等捨心無分別無異心文  
殊師利以是義故言不生不滅者是名如來爾時世  
尊而說偈言

如來常不生	諸法亦復然	世間無實法
愚癡妄取相	無漏善法中	無如及如來
依彼善法力	現世如鏡像	

文殊師利譬如日光初出先照最大山王次照所迦  
婆羅山摩訶所迦婆羅山次照餘大山次照餘黑山  
次照高原堆阜後照深谷卑下之處文殊師利而彼  
日光不分別無分別不思惟何以故文殊師利彼日  
光明無心意識不生不滅無相離相無念離念無  
戲論無障礙離障礙不住此岸不住彼岸不高不下  
不縛不脫不知非不知無煩惱非無煩惱非實非不  
實不在此岸不在彼岸不在陸地不在水中不在兩  
岸不住中流無覺離覺無色非無色文殊師利依於  
大地有高下中日光隨地有高下中文殊師利如來

應正徧知亦復如是不分別無分別不思惟文殊師  
利何以故如來應正徧知離心意識不生不滅無  
相離相無念離念無戲論離戲論無熱惱離熱惱不  
住此岸不住彼岸不高不下不縛不脫不知非不知  
無煩惱非無煩惱非實語者非不實語者不在此岸  
不在彼岸不在陸地不在水中不在兩岸不在中流  
非一切知者非無一切知者非覺者非無覺者非行  
者非無行者非修習者非無修習者非念者非無念  
者非有心者非無心者離心者非離心者無意者非  
無意者非害者非無害者無名者非無名者非色者

經

文殊師利菩薩摩訶薩六度集經卷第十一

十一

男九

經

文殊師利菩薩摩訶薩六度集經卷第十一

男九

非無色者非說者非無說者非假名者非無假名者  
非可見者非不可見者體性如是非不如是非說道  
者非無說道者非證果者非無證果者非分別者非  
無分別者非離分別者非無離分別者文殊師利依  
彼無邊法界衆生上中下性如來放大智日光輪普  
照衆生亦復如是初照一切諸菩薩等清淨直心大  
乘山王次復照於住辟支佛乘次復照於住聲聞乘  
次復照於隨所能信善行衆生次復照於乃至住邪  
聚衆生皆爲如來一切智日光輪所照爲畢竟利益  
一切衆生爲生未來一切善根爲令增長一切善根

文殊師利如來於彼一切事中平等捨心無分別無  
異心文殊師利諸佛如來智日光輪無如是心我爲  
此衆生說於妙法而不爲彼衆生說法文殊師利諸  
佛如來無有如是分別之心此衆生信上法此衆生  
信中法此衆生信下法此衆生信正法此衆生信邪  
法文殊師利諸佛如來無如是心此衆生信上法爲  
說大乘此衆生信中法爲說緣覺乘此衆生信下法  
爲說聲聞乘此衆生信正行爲說清淨心法乃至此  
衆生信邪行隨所應聞而爲說法文殊師利諸佛如  
來智日光輪無有如是分別之心何以故諸佛如來

智日光輪遠離一切分別異分別及諸戲論文殊師  
利依諸衆生種種善根諸佛如來智日光輪種種別  
異文殊師利譬如大海中有如意寶珠懸置高幢上  
隨何等何等衆生念須何等何等事如是如是聞彼  
摩尼寶珠出聲而彼摩尼寶珠不分別無分別不思  
惟無心離心離心意意識文殊師利如來亦復如是  
不分別無分別不思惟無心離心離心意意識不可  
測量離諸測量不得離得貪不能轉瞋不能轉癡不  
能轉不實不妄語非常非不常非煇非不煇非明非  
不明非覺者非不覺者不生不滅不思議不可思議

無體離體不可取不可捨不可戲論不可說離諸言  
說不喜離喜無生不可數離諸數量不去無去去寂  
絕一切諸趣離一切言說不可見不可觀不可取非  
虛空非不虛空非可見非可說非和合非離和合非  
作非造非示非染非可清淨非名非色非相非無相  
非業非業報非過去非未來非現在非有煩惱非無  
煩惱非諍非不諍非聲離一切聲無言無相離一切  
相非內非外亦非中間文殊師利而如來寶珠清淨  
直心懸大慈悲高幢之上隨何等何等衆生信何等  
何等衆生行聞如是如是說法聲文殊師利如來於

一切事平等捨心無分別無異心文殊師利譬如響聲從他而出衆生得聞而彼響聲非過去非未來非現在非內非外非二中間可得非生非滅非斷非常非知非不知非覺非不覺非明非不明非縛非脫非毀非不毀非念非不念非處非不處非住非不住非地界非水界非火界非風界非有爲非無爲非戲論非不戲論非聲非不聲非見非不見非字非言非離言語非稱量離稱量非相離相非寂靜非離寂靜非長非短非心非不心非觀非不觀非可見相非不可見相非空非不空自體空非可念非不可念離可念

非可覺非不可覺離心意意識一切處平等無分別離異分別過三世文殊師利而彼響聲隨種種衆生種種言音聞種種響文殊師利如來應正徧知說法音聲亦復如是非過去非未來非現在非內非外非二中間可得非生非滅非斷非常非知非不知非覺非不覺非明非不明非縛非脫非毀非不毀非念非不念非處非不處非住非不住非地界非水界非火界非風界非有爲非無爲非戲論非不戲論非聲非不聲非見非不見非字非言非離言語非稱量離稱量非相離相非寂靜非離寂靜非長非短非心非不

心非觀非不觀非可見相非不可見相非空非不空  
自體空非可念非不可念離可念非可覺非不可覺  
離心意意識一切處平等無分別離異分別過三世  
文殊師利隨種種衆生種種信種種解聞於如來應  
正徧知如是如是說法音聲文殊師利譬如大地任  
持萬物生長一切穀麥果蔬菜草木樹林建立成就文  
殊師利而彼大地不分別無異分別一切處平等無  
分別無異分別心無心離心意意識文殊師利如來  
應正徧知亦復如是依於如來應正徧知任持一切  
衆生生長一切善根建立成就一切聲聞辟支佛菩

薩及諸外道種種異見尼捷子等從於邪見乃至邪  
定聚衆生所有諸善根彼諸善根皆是如來應正徧  
知之所住持皆依如來應正徧知而得生長建立成  
就文殊師利而如來應正徧知離一切分別無分別  
異分別念離一切心意意識不可觀離諸觀不可見  
離諸見不可思惟離諸思惟不可念離諸念心平等  
無平等捨一切處無分別離異分別文殊師利譬如  
虛空一切處平等無分別異分別不生不滅非過去  
非未來非現在不可見不可戲論無色不可示不可  
表不可觸不可護不可量離思量不可譬喻離諸譬

喻無住處不可取離眼識道離心意識無相無字  
無聲無念無取無捨不可轉不可換離言語道一切  
處住一切處入文殊師利如諸衆生以依地有高下  
中故而言虛空有高下中而彼虛空無高下中文殊  
師利如來應正徧知亦復如是於一切處平等無分  
別異分別不生不滅非過去非未來非現在不可見  
不可戲論無色不可示不可表不可觸不可護不可  
量離思量不可譬喻離諸譬喻無住處不可取離眼  
識道離心意意識無相無字無聲無念無取無捨不  
可轉不可換離言語道一切處住一切處入文殊師

利依衆生心有高下中故見如來有高下中而實如  
來無高下中文殊師利如來無如是心此衆生有下  
信心我示下形色此衆生有中心心我示中形色此  
衆生有上信心我示上形色文殊師利如來說法亦  
復如是文殊師利如來無如是心此衆生有下信心  
我爲說聲聞法此衆生有中心心我爲說辟支佛法  
此衆生有上信心我爲說大乘法文殊師利如來無  
如是心此衆生信布施故我爲說檀波羅蜜此衆生  
信持戒故我爲說尸波羅蜜此衆生信忍辱故我爲  
說羸提波羅蜜此衆生信精進故我爲說毗梨耶波

羅蜜此衆生信禪定故我爲說禪波羅蜜此衆生信  
智慧故我爲說般若波羅蜜

如來莊嚴智慧光明入一切佛境界經卷上

吳江居士周祇施刻此卷祈  
先考周乾南離苦得樂修證菩提  
姑蘇沙門如月對長洲徐普書進賢洪以忠刻  
萬曆乙亥夏閏月徑山寂照庵識

如來莊嚴智慧光明入一切佛境界經卷下

元魏三藏法師曇摩流支譯

文殊師利如來者名爲法身文殊師利如來不生無  
生文殊師利如來無名無色無言說無心意意識文  
殊師利如來無分別離分別文殊師利言如來者名  
爲空不可盡相盡際實際空平等一切法際不二際  
常不可知處際文殊師利如來應正徧知一切處無  
分別離異分別非下非中非上如是文殊師利一切  
法無分別離分別非下非中非上何以故一切法不  
可得故文殊師利言一切法不可得者是一切法平

等言一切法平等者是平等住言平等住者即是不動言不動者是一切法無依止言一切法無依止者彼無心定住言無心定住者即是無生言無生者即是不生若如是見彼心心數法畢竟不顛倒若畢竟心不顛倒者彼行者能得如實若能如實得者彼不起戲論若不起戲論者彼不行一切法若不戲不行者彼不在生死若不在生死者彼不能動若不能動者彼法不能相違若彼法不能相違者彼隨順一切法彼隨順一切法者彼法性中不能動若法性中不能動者彼得自性法若得自性法者彼無所得何以

故依因緣生一切法故若依因緣生一切法者彼常不生若常不生者彼常不可得若常不可得者彼得實際法若得實際法者彼不共一切法住若不共一切法住者彼不共住若不共住者彼非有非無若非有非無者彼得法中住若得法中住者彼得修行正念法若得修行正念法者彼無一法非是佛法何以故以覺一切法空故文殊師利覺一切法空者名爲菩提菩提者名覺一切法空空者即是菩提如是空無相無願無作無行無依無生無取無處覺如是法者名爲菩提菩提者名爲修行正念文殊師利言修

行正念者不取不捨卽名正念不觀不異名爲行不  
著不縛不脫名爲行不去不來名爲行文殊師利正  
念行者彼處無行無利無果無證何以故文殊師利  
心自性清淨故彼心客塵煩惱染而自性清淨心不  
染而彼自性清淨心卽體無染不染者彼處無對治  
法故以何法對治能滅此煩惱何以故彼清淨非淨  
卽是本淨若本淨者卽是不生若不生者彼卽不染  
若不染者彼不離染法若離染法者彼滅一切染以  
何等法滅一切染彼不生若不生者是菩提菩提者  
名爲平等平等者名爲真如真如者名爲不異不異

者名爲如實性一切有爲無爲法文殊師利真如者  
彼處非有爲非無爲無二法若非有爲非無爲無二  
法者是真如文殊師利言真如者彼實際言實際者  
彼不異不異者彼未來真如言未來真如者卽是不  
異言不異者彼卽真如言卽真如者彼非常不真如  
言非常不真如者彼不染不淨言不染不淨者彼不  
生不滅言不生不滅者彼涅槃平等言涅槃平等者  
彼不在世間不在涅槃言不在世間不在涅槃者彼  
非過去非未來非現在言非過去非未來非現在者  
彼非下非中非上言非下非中非上者卽是如來言

如來者名爲實語言實語者名爲真如言真如者名爲如實言如實者名爲我言我者卽是不二不二義者卽是菩提菩提者名爲覺覺者入三解脫門智智者入三世平等一切法智言義者於一切法無差別義義者無名無言不可說言智者覺了一切法名爲智知識一切法名爲智言義者知衆生及識智了義卽是法法者卽是義義智識智了義智法智法住智法體智彼依法轉所轉義自轉平等不二義平等不二義卽是平等平等者卽是義所言義識智平等者卽是人不二法門智名爲了義非不了義言平等者

卽是平等卽是空言空者卽是幻我平等言我平等者卽是法平等言法平等者卽是離平等離平等者卽是覺平等覺平等者卽是菩提文殊師利著色者卽是著眼著眼者卽是著自性著見者卽是著自我著自身者卽是著自性空智者不正念觀者卽是著法光明觀法不著著懈怠垢者著證智堅固精進如實知法名爲著著五蓋菩提分名爲著不著無障解脫智一切法自性清淨因緣而有又菩薩摩訶薩如實知染淨因而不住染淨因中者起我起見是名染因入一切法無我是名淨因見我我所是名染因內

寂靜外不行是名淨因欲瞋恨害覺觀是名染因不淨慈悲喜捨入十二因緣忍爲淨因四顛倒是染因四念處是淨因五蓋是染因五根是淨因六入是染因六念是淨因七非淨法是染因七覺分是淨因八邪法是染因八正法是淨因九惱事是染因九次第定是淨因十不善業道是染因十善業道是淨因略說一切不善念是染因一切善念是淨因所言染因淨因彼一切法自性空無我無人無命無壽者無我所無使者如幻無相內寂靜內寂靜者卽是寂滅寂滅者卽是自性清淨自性清淨者卽是不可得不可

得者卽是無處無處者卽是實實者卽是虛空何以故文殊師利無有一法若生若滅文殊師利白佛言世尊若法如是云何如來得菩提佛告文殊師利言文殊師利無根無住如來如是得菩提文殊師利言世尊何者是根何者是住佛告文殊師利身見名爲根不實分別名爲住彼菩提平等如來知一切法平等是故說如來無根無住得菩提文殊師利言菩提者名爲淨亦名寂靜何者爲淨何者寂靜文殊師利我我所眼空何以故自性空故如是耳鼻舌身意我我所空何以故自性空故是故知眼空不著色是故

說淨如是知耳空不著聲是寂靜知鼻空不著香是寂靜知舌空不著味是寂靜知身空不著觸是寂靜知意空不著法是寂靜文殊師利菩提自性清淨以自性清淨故自性清淨者所言自性清淨彼不染如虛空平等如虛空自性同虛空譬如虛空本來自性清淨文殊師利言菩提者不取不捨云何不取云何不捨言不取者不取一切法是故言不取言不捨者不捨一切法是故言不捨文殊師利如來度大漂流是故不取不捨而彼真如不見彼此岸如來知一切法離彼此岸故言如來文殊師利菩提無相無觀何

者不觀文殊師利不見眼識名爲無相不見色名爲無觀不見耳識名爲無相不聞聲名爲無觀不見鼻識名爲無相不聞香名爲無觀不見舌識名爲無相不知味名爲無觀不見身識名爲無相不知觸名爲無觀不見意識名爲無相不知法名爲無觀文殊師利是諸聖人境界所謂三界境界文殊師利言菩提者非過去非未來非現在三世平等三世清淨文殊師利何者是三世智所謂過去法心不行未來法識不去現在法念不住是故如來不住心意意識以不住不分別無分別以不分別無分別故不見未來法

現在法無戲論文殊師利菩提無身無爲何者是無  
身何者是無爲文殊師利無身者所謂非眼識知非  
耳鼻舌身意識知文殊師利若非心意意識知彼無  
爲言無爲者不生不住不滅是故言三世清淨無爲  
如無爲知有爲亦如是何以故所言一切法體者卽  
是無體無體者彼處無二言文殊師利言菩提者名  
爲無差別足跡何者無差別何者足跡文殊師利無  
相名無差別真如名足跡無住名無差別法名足跡  
無異名無差別實際名足跡不可得名無差別不動  
名足跡空名無差別無相名足跡無覺名無差別無

願名足跡不求名無差別無衆生名足跡衆生體名  
無差別虚空名足跡不見名無差別不生名足跡不  
滅名無差別無爲名足跡無行名無差別菩提名足  
跡寂靜名無差別涅槃名足跡不起名無差別覺名  
足跡文殊師利菩提者不可以身得不可以心得何  
以故文殊師利身者頑癡無覺無心譬如草木墻壁  
土塊影像心者如幻空無所有不實不作文殊師利  
身心如實覺名爲菩提依世間名字非第一義何以  
故文殊師利菩提非身非心非法非實非不實非諦  
非不諦不可如是說文殊師利不可以一切法說菩

提何以故文殊師利菩提無住處可說文殊師利譬如虛空無住處可說無爲無生無滅菩提亦如是無住無爲無生無滅可說文殊師利譬如一切世間之法若求其實不可得說文殊師利菩提亦如是以一切法說菩提實亦不可得何以故文殊師利實法中無名字章句可得何以故不生不滅故文殊師利言菩提者名不可取不可依文殊師利何者不可取何者不可依文殊師利如實知眼不可取不見色名爲不可依如實知耳不可取不聞聲名爲不可依如實知鼻不可取不聞香名爲不可依如實知舌不可取

不知味名爲不可依如實知身不可取不覺觸名爲不可依如實知意不可取不見諸法名爲不可依文殊師利如是如來不取不依名證菩提如是證菩提不取眼不見色是故不住眼識不取耳不聞聲是故不住耳識不取鼻不聞香是故不住鼻識不取舌不知味是故不住舌識不取身不覺觸是故不住身識不取意不知法是故不住意識文殊師利如來不住心意意識是故得名如來應正徧知文殊師利衆生有四種心住法依彼四種心住法何等爲四所謂衆生依色心住如是受想行等是爲衆生依四種心住

文殊師利此四種心住法如來如實知不生不滅是  
故名爲佛文殊師利言菩提者名爲空文殊師利如  
彼一切法空不異菩提空菩提空卽一切法空如彼  
一切法空如來如實知名爲覺者文殊師利非空空  
智文殊師利空者卽菩提菩提卽是空文殊師利空  
中無空亦無菩提亦無二以何等法爲空何等法爲  
菩提而說二名何以故文殊師利一切無二無相無  
差別無名無相離心意意識不生不滅不行無行不  
集無字無聲文殊師利言空者名取戲論文殊師利  
而第一法中無法可得名爲空文殊師利如說虛空

虛空而無虛空可名名爲虛空文殊師利空亦如是  
說名空空而無法可說名之爲空如是入一切法是  
名入一切法門文殊師利一切法無名而依名說文  
殊師利如名非此處不離此處如是依名說何等法  
彼法非此處不離此處如是文殊師利如來如實知  
一切法本來不生不起不滅無相離心意意識無字  
無聲文殊師利言菩提者如虛空平等虛空非平非  
下非高菩提亦非平非下非高何以故文殊師利法  
無實有文殊師利若法無實有云何說平等非下非  
高文殊師利如來如是覺一切法平等非高非下如

是覺已無有少法不平等不高不下如彼法住如是  
如如實智知文殊師利何者如實智文殊師利如  
實知一切法者一切法無本來不生不滅法本不生  
生已還滅彼諸法無作者無取者而生無作者無取  
者而滅文殊師利諸法依因緣生無因緣滅無實道  
者是故如來爲斷道者說法文殊師利言菩提者名  
爲如實足跡文殊師利何者如實足跡文殊師利  
言如實足跡者卽是菩提如菩提色亦如是不離如  
如是不離如受想行識如菩提地界如不離如水火  
風亦不離如如菩提如是眼界色界眼識界不離如

文殊師利如菩提耳界聲界耳識界不離如文殊師  
利鼻界香界鼻識界不離如舌界味界舌識界不離  
如身界觸界身識界不離如意界法界意識界不離  
如文殊師利一切法假名法者謂五陰十二入十八  
界彼法如來如實覺非顛倒覺如彼法住本際中際  
後際如來如實知本際中際後際如彼法本際不生  
未來際不去現在際不住如實知如彼法足跡如一  
法一切法亦如是如一切法一法亦如是文殊師利  
而一多不可得文殊師利入一切法阿門無阿門文  
殊師利何者阿門何者無阿門文殊師利言阿者初

發一切善根法無阿者不見一切法言阿者心不住能令住言無阿者無相三昧解脫門言阿者稱數觀諸法相言無阿者名爲過量何者是過量謂無識業言阿者觀有爲法言無阿者觀無爲法文殊師利言菩提者是無漏無取法文殊師利何者是無漏是無取文殊師利言無漏者謂離四漏何者爲四謂欲漏有漏無明漏見漏以不取彼四種漏故是故名爲遠離諸漏文殊師利何者無取謂離四取何等爲四謂欲取見取我取戒取以此諸漏衆生爲無明所闇愛水所潤迭共相因虛妄取著文殊師利如來如實知

我根本以我清淨如實知一切衆生清淨所言我清淨一切衆生清淨此二無二無差別義卽是無生無滅文殊師利無生無滅何等法處心意意識所不能知文殊師利何等法上無心意意識彼法中無分別何等法而生不正念是故菩薩生於正念生正念者不起無明不起無明者不起十二有支不起十二有支者彼是不生不生者卽是位位者卽是了義了義者卽是第一義第一義者卽是無我義無我義者卽是不可說義不可說義者卽是因緣義因緣義者卽是法義法義者卽是如義是故言見因緣者卽

是見法見法者卽是見如來所言見者雖見諸法而無所見文殊師利言有所見者謂見心見觀如來不見心若不見心不見觀彼是見實文殊師利彼諸法如是平等如來如彼法平等而知文殊師利言菩提者名爲淨無垢無點文殊師利何者爲淨何者無垢何者無點文殊師利空名爲淨無相名無垢無願名無點文殊師利無生名爲淨無行名無垢無起名無點文殊師利自性名爲淨善根淨名無垢光明圓滿名無點無戲論名爲淨離戲論名無垢寂滅一切戲論名無點如名爲淨法界名無垢實際名無點虛空

名爲淨無礙名無垢不見名無點內清淨名爲淨外不行名無垢內外不見名無點陰聚名爲淨法界自體名無垢十二入無去名無點過去盡智名爲淨未來無生智名無垢現在住法界智名無點文殊師利略言淨無垢無點入一平等法足跡中所謂寂靜足跡言寂靜足跡者卽是寂滅寂滅者卽是淨淨者卽是聖文殊師利如虛空菩提亦如是如菩提法亦如是如法法體亦如是如法體衆生亦如是如衆生國土亦如是如國土涅槃亦如是文殊師利如來說一切法平等如涅槃以畢竟究竟無所治法離諸所治

法以本來清淨本來無垢本來無點文殊師利如來如是如實覺一切法觀察一切衆生性卽生清淨無垢無點奮迅大慈悲心文殊師利云何菩薩行菩薩行文殊師利若菩薩不生心不爲諸法盡不爲諸法生非不爲諸法不生見諸法本來盡見諸法不盡而不生慢心言我如是知而不壞諸法本來不生文殊師利菩薩如是行菩薩行復次文殊師利菩薩不見過去心盡行菩薩行不見未來心未到行菩薩行不見現在心有行菩薩行而不著過去未來現在心中如是行菩薩行文殊師利布施菩薩如來無二無差

別如是行名行菩薩行持戒菩薩如來無二無差別如是行名爲行菩薩行忍辱菩薩如來無二無差別如是行名行菩薩行精進菩薩如來無二無差別如是行名行菩薩行禪定菩薩如來無二無差別如是行名行菩薩行般若菩薩如來無二無差別如是行名行菩薩行文殊師利菩薩不見色空不見色不空如是行名行菩薩行何以故色空色性如是文殊師利菩薩如是不行受想行識不離受想行識如是行名爲行菩薩行何以故以不見心意意識文殊師利無有一法若知若離若修若證文殊師利言盡者彼

法常盡非不盡本來盡若法本盡彼法不可盡以不可盡是故說盡何以故以如實盡故若如實盡彼法不盡一法若不盡一法彼法無爲若法無爲彼無爲法不生不滅是名如來若如來出世及不出世法性法體法住法位法界如實法界如實住法智不生不滅依彼智故知無爲法文殊師利若入如是等諸法位者知諸漏法不生不滅文殊師利言諸漏盡者此依世間名字假言而說而彼真如法身無有法生亦無法滅爾時文殊師利法王子菩薩摩訶薩卽從座起偏袒右肩右膝著地合掌向佛卽以妙偈讚歎如

來而說頌曰

無色無形相	無根無住處	不生不滅故
敬禮無所觀	不住亦不去	不取亦不捨
遠離六入故	敬禮無所觀	出過於三界
等同於虛空	諸欲不染故	敬禮無所觀
於諸威儀中	去來及睡寤	常在寂靜故
敬禮無所觀	去來悉平等	以住於平等
不壞平等故	敬禮無所觀	入諸無相定
見諸法寂靜	常入平等故	敬禮無所觀
諸佛虛空相	虛空亦無相	離諸因果故

敬禮無所觀 虛空無中邊 諸佛身亦然

心同虛空故 敬禮無所觀 佛常在世間

而不染世法 不分別世間 敬禮無所觀

諸法猶如幻 而幻不可得 離諸幻法故

敬禮無所觀

爾時世尊告文殊師利言善哉善哉文殊師利快說此法文殊師利如是如是諸佛如來不應以色見不應以法見不應以相見不應以好見不應以法性見文殊師利諸佛如來非可獨見非可眾見文殊師利諸佛如來無有人見無有人聞無有人現在供養無

有人未來供養文殊師利諸佛如來不說諸法一不說諸法多文殊師利諸佛如來不證菩提諸佛如來不依一法得名亦非多法得名文殊師利諸佛如來不見諸法不聞諸法不念諸法不知諸法不覺諸法文殊師利諸佛如來不說一法不示諸法文殊師利諸佛如來現在不說諸法不示諸法文殊師利諸佛如來不飲不食文殊師利諸佛如來無有法證文殊師利諸佛如來不斷染法不證淨法文殊師利諸佛如來不見諸法不聞諸法不觀諸法不知諸法何以故以一切法本清淨故文殊師利若有人以三千大

千世界微塵數等衆生令置辟支佛地於此法門不生信心若復有菩薩信此法門此菩薩功德尚多於前何況有人於此法門若自書寫令他書寫福多於彼無量無邊文殊師利若三千大千世界所有衆生若卵生若胎生若濕生若化生若有色若無色若有想若無想若一足若二足若三足若四足若多足若無足彼諸衆生假使一時皆得人身發菩提心悉爲菩薩一一菩薩各以飲食衣服牀榻臥具病瘦湯藥種種資生一切樂具奉施供養恒河沙阿僧祇佛國土微塵數等諸佛如來及諸菩薩諸聲聞僧如是乃

至恒河沙阿僧祇劫彼諸如來菩薩聲聞入涅槃後造七寶塔高一由旬衆寶欄楯周而圍繞摩尼寶鬘以爲間錯豎寶幢幡蓋自在摩尼寶王羅網彌覆其上所得功德不可稱計若復有菩薩以畢竟深淨信心此如來莊嚴智慧光明入一切佛境界經信此法門入此法門不疑此法門於此法門生清淨心乃至爲他演說一偈此菩薩所得功德甚多無量阿僧祇以此功德比前功德百分不及一歌羅千分不及一百千分不及一百千萬分不及一百千萬億分不及一數分不及一乃至算數譬喻所不能及何以故以

能成就證佛智故文殊師利若有在家菩薩以飲食  
衣服牀榻臥具病瘦湯藥種種資生一切樂具奉施  
供養恒河沙等阿僧祇諸佛如來及諸菩薩諸聲聞  
僧如是乃至恒河沙等阿僧祇劫所得功德不可稱  
計若復有出家菩薩持戒心清淨乃至施與畜生衆  
生乃至一口飲食所得功德甚多無量阿僧祇以此  
功德比前功德百分不及一歌羅千分不及一百千  
萬分不及一百千萬億分不及一歌羅少分不及一  
乃至算數譬喻所不能及文殊師利假使三千大千  
世界微塵數等出家菩薩持戒心清淨一一菩薩各

以飲食衣服牀榻臥具病瘦湯藥種種資生一切樂  
具奉施供養十方世界恒河沙等阿僧祇諸佛如來  
及諸菩薩諸聲聞僧如是乃至恒河沙等阿僧祇劫  
所得功德不可稱計若復有菩薩持戒心清淨若在  
家若出家聞此法門生信不疑若自書寫教他書寫  
所得功德甚多無量阿僧祇以此功德比前菩薩檀  
施功德百分不及一歌羅千分不及一百千萬分不  
及一數分不及一乃至算數譬喻所不能及文殊師  
利若有菩薩摩訶薩以滿三千大千世界七寶奉施  
供養諸佛如來如是乃至三千大千世界微塵數劫

所得功德不可稱計若復有菩薩爲餘菩薩於此法門中乃至說一四句偈所得功德甚多無量阿僧祇以此功德比前功德百分不及一歌羅千分不及一百千萬分不及一百千萬億分不及一數分不及一歌羅少分不及一算數分不及一乃至算數譬喻所不能及文殊師利置滿三千大千世界七寶於三千大千世界微塵數劫以用布施所得功德文殊師利若復有恒河沙等諸菩薩一一菩薩恒河沙等阿僧祇佛國土閻浮檀金以爲世界一切諸樹天衣纏裹集一切光明王摩尼寶羅網以覆其上自在王摩尼

寶以爲樓閣電光明摩尼寶以爲欄楯如意寶珠滿彼世界豎立一切諸寶幢幡蓋於日月中奉施供養恒河沙等阿僧祇諸佛如來如是布施乃至恒河沙等阿僧祇劫所得功德不可稱計若復有菩薩依此法門爲餘菩薩於此法門中乃至說一四句偈所得功德甚多無量阿僧祇以此功德比前功德百分不及一歌羅千分不及一百千萬分不及一百千萬億分不及一數分不及一歌羅少分不及一僧企耶分不及一數分不及一憂波尼沙陀分不及一乃至算數譬喻所不能及文殊師利假使三界中所有衆生

彼諸衆生於地獄畜生餓鬼中所有在家菩薩拔出  
爾許地獄畜生餓鬼衆生置辟支佛地所得功德不  
可稱計若復有出家菩薩乃至施與畜生一口飲食  
所得功德勝前功德無量無邊阿僧祇文殊師利若  
復有十千國土不可數億那由他百千萬億那由他  
微塵數等出家菩薩一一菩薩十方世界於一一方  
見十億不可說百千萬億那由他微塵數等諸佛如  
來一一如來及諸菩薩諸聲聞僧以飲食衣服臥具  
牀榻病瘦湯藥種種資生一切樂具滿千億那由他  
百千萬億那由他不可說微塵世界自在王摩尼珠

於一日中施一一如來并諸菩薩及聲聞僧如是  
乃至十億那由他百千萬億那由他佛國土微塵數  
不可說劫所得功德不可稱計若復有菩薩信此法  
門乃至施與一畜生衆生乃至一口飲食所得功德  
甚多無量阿僧祇以此功德比前功德百分不及一  
歌羅千分不及一百千分不及一百千萬分不及一  
百千萬億分不及一僧企耶分不及一歌羅少分不  
及一數分不及一乃至算數譬喻所不能及何以故  
以能信此法門不退轉菩薩印故文殊師利若有菩  
薩教化十方一切世界所有衆生置信行中若復有

菩薩化一衆生置義行中所得功德勝前功德無量  
無邊若復有菩薩教化十方一切世界所有衆生置  
義行中若復有菩薩化一衆生置法行中所得功德  
勝前功德無量無邊文殊師利若復有菩薩教化十  
方一切世界所有衆生置法行中若復有餘菩薩化  
一衆生置八人中所得功德勝前功德無量阿僧祇  
文殊師利若復有菩薩教化十方一切世界所有衆  
生置八人中若復有菩薩化一衆生令得須陀洹果  
所得功德勝前功德無量阿僧祇文殊師利若復有  
菩薩教化十方一切世界所有衆生令得須陀洹果

若復有菩薩化一衆生令得斯陀含果所得功德勝  
前功德無量阿僧祇文殊師利若復有菩薩教化十  
方一切世界所有衆生令得斯陀含果復有菩薩化  
一衆生令得阿那含果所得功德勝前功德無量阿  
僧祇文殊師利若復有菩薩教化十方一切世界所  
有衆生令得阿那含果若復有菩薩化一衆生令得  
阿羅漢果所得功德勝前功德乃至無量阿僧祇文  
殊師利若復有菩薩教化十方一切世界所有衆生  
令得阿羅漢果若復有菩薩化一衆生令得辟支佛  
道所得功德勝前功德乃至無量阿僧祇文殊師利

若復有菩薩教化十方一切世界所有衆生令得辟支佛道若復有菩薩化一衆生令發菩提心所得功德乃至無量無邊阿僧祇文殊師利若復有菩薩教化十方一切世界所有衆生令發菩提心若復有菩薩化一衆生令得不退地所得功德勝前功德乃至無量阿僧祇文殊師利若復有菩薩教化十方一切世界所有衆生令得不退轉地若復有菩薩信此法門若自書寫教他書寫廣爲人說所得功德勝前功德乃至無量阿僧祇如是乃至百千萬億那由他分不及其一爾時世尊而說偈言

菩薩能住持	十億佛妙法	若人聞此經
功德勝於彼	爲禮諸佛足	神通遊十方
以華香塗香	供養十億佛	若有聞此經
爲人須臾說	功德勝於彼	其數無有量
若聞佛法身	爲第二人說	鈍聞生利智
速證無上道	爲佛天人中	造立諸妙塔
滿足無量億	上至於有頂	周匝徧十方
塔中豎幢幡	金鈴七寶蓋	如是供養佛
菩薩聞此經	若能自書寫	若教他書寫
其福勝於彼	若人持此經	遠離於慳妬

彼功德無量 速成大菩提 此經顯法身

如空現衆像 無量諸佛說 是故應護持

佛說此經已文殊師利法王子及無量阿僧祇不可  
說不可說諸菩薩摩訶薩及諸聲聞衆一切世間天  
人阿脩羅等聞佛所說歡喜奉行

如來莊嚴智慧光明入一切佛境界經卷下



吳江居士周祇施刻此卷祈過去宗親現在眷  
屬離苦得樂修證菩提  
姑蘇沙門如月對長洲徐普書溧水芮一鶚刻  
萬曆己亥夏閏月徑山寂巖庵識